

# Hebreo'su

## a'inga tevaen'cho

---

### Chigaja tise Dutssi'yei'ccu a'inga afa

**1** <sup>1</sup>Tayopi Chigaja ccushaya'chone ingi tayopi'su israe'su coenzandecunga condaseñacca. Nane Chiga Aya'fama afasundeccuma in'jaensi tsendeccu tsu condase'fa. Cca'i Chiga Aya'fama afasundeccuma'qqe ccaningae in'jaensi tsendeccu'qqe tsane ti'tsse condase'fa. <sup>2</sup>Chigaja tayopi tsendeccui'ccu condasepa ja'ñojan Tise Dutssi'yema moen cuintsu inginga condaseye. Tseyi me'ttia'ye Chigaja Dutssi'yema oshaensi tsu osha'cho andeni, sefacconi jinque'suve agattoen. Toya'caen Chigaja pa'cco agattoen'choma Dutssi'yenga afesi tise tsu pa'ccone na'su. <sup>3</sup>Dutssi'yeja tsa'caen an'biamba tise joccapitssia aya'fai'ccu tsu osha'choma tansintsse manda'je. Chigaja a'tatssipa joccapitssiasia tise'qqe tsa'caen joccapitssia tsu. Ma'caen Chiga jincho'nijan tise'qqe tsa'caeñi tsu jincho. A'i egae tsincon'chone ccushaeña'choma nanimba tsu tiseja Chiga sefacconi ansundepa Chiga tansinfanga dyaipa Chigai'ccu manda'je.

### Chiga Dutssi'yeja ti'tsse'tssia tsu

<sup>4</sup>Tiseja Chigama sefacconi'su shondosundeccuma ti'tsse'tssia've dapa can'jen. Nane tise inise Chigama sefacconi'su shondosundeccu inisema ti'tsse'tssia'caen tsu tiseja tsendeccuma ti'tsse'tssia. Tiseja Chiga Dutssi'ye tsu, Chiga Quitsa tisema tsa'caen inisiansi. <sup>5</sup>Nane Chigaja Tisema sefacconi'su shondosundeccuma qqen afambipa Dutssi'yema tsu afa:

Que qui ña Dutssi'ye.

Ja'ño gi quema atte.

Toya'caen Tisema sefacconi'su shondosundeccuma qqen afambi:

Ña gi tise yaya.

Tiseja ña Dutssi'ye tsu.

<sup>6</sup>Tsa'ma Chiga Quitsaja Tise Dutssi'yeveyi va andeni moemba atepa su:

In'jan gi cuintsu poiye'cco ñama sefacconi'su shondosundeccu tisema ñotsse afa'faye.

- 7 Chigaja Tisema sefacconi'su shondosundeccune qquen afa:  
 Ñama sefacconi'su shondosundeccuja fingiancan'fa tsu.  
 Ña manda moensi quia'me ja'fa.  
 Ñama fuitesundeccuja si'ngia'can'fa tsu.  
 Ña mandasi dyo'tsse tson'fa.
- 8 Tsa'ma Dutssi'yene tsu Chigaja qquen su:  
 Que qui Chiga.  
 Tsangae joccapitssia na'suve dapa qui manda'je.  
 Quini'ccopave dapa qui  
 ñotsse tansintsse manda'je.
- 9 Ñotssiaveyi in'jamba qui egama chi'ga.  
 Tsa'cansi Chiga Quitsa, que Chigaja, quema na'suve ccutsiansi qui  
 queja poiyl'cco nasundeccuma ti'tsse avujatssi.
- 10 Toya'caen tsu su:  
 Na'su, me'ttia'ye ñotsse ñoñamba qui va andeve agattoen.  
 Sefaconi jincho'cho'qqe que tivei'ccu agattoen'cho tsu.
- 11 Ande, sefacco'qqe tsu pasaya.  
 Tsa'ma queja tsangae qui jinchoya.  
 Nane ondiccu'je tssoruve daquia'caen tsu  
 sefacco ande'qqe pasa'faya.
- 12 A'i tssoru sarupama ompangoemba joquitssianquia'caen qui  
 que agattoen'choma pasaeña.  
 Ondiccu'jema cambianquia'caen qui  
 tayo'suma pansaemba cuna agattoen'chove cambiaña.  
 Tsa'ma Queja ccaningae daya'bi.  
 A'ija coenza ccashe'yeye dapa pa'fa.  
 Tsa'ma Queja tsa'caen dambipa tsangae qui canse.
- 13 Toya'caen ni fae'ccoeyl'qqe Chigaja Tisema sefacconi'su  
 shondosundeccunga qquen afambi:  
 Ñai'ccu fae'ngae na'suve dapa  
 ña tansinfanga dyaija  
 ñajan quema iyiccayesundeccuma patsusi  
 que tsu'tte tsosiccunga ccuiquia'caen oshambipa quema  
 paña'faya'ngae.
- 14 Nane poiyl'cco Chigama sefacconi'su shondosundeccuja Chigama  
 fuitesundeccu tsu. Chigaja tise'pama ttu'sepa qqwendya'pama  
 moenquia'caen a'ima fuite'faye moen. Majan Chiga ccushaeña'chove  
 isuya'chondeccuma fuite'faye tsu manda.

### Ccushaeña'choma cati'fajama

**2** <sup>1</sup>Tsa'caen Chiga Dutssi'yeya sefacconi'su shondosundeccuma ti'tsse'tssiasi gi  
 tise inginga condase'choma ti'tsse paña'faya'cho. Ñotsse tsu paña'faya'cho,

shavo ñotsse tandambisi ai jaquua'caen injanga pañamba aqqe'pasa'ne. <sup>2</sup>Nane Chigama sefacconi'su shondosundeccu tayopi Moisésnga condase'choja ñoa'me su'cho tsu. Tsa'cansi poi'cco egae tsinconsundeccu, majan pañambindequua'qqe shacapapa tsu Chiga suquua'caen ccushambe'yi vana'jen'fa. <sup>3</sup>Tsa'cansi ingija va ti'tssetssia ccushaëña'choma pañamba chi'ga'ta zma'caen gi ccusha'faya? Ñoa'me gi ccusha'faya'bi. Tseyi Na'suja va ccushaëña'chone a'inga condasesi Tisema pañasundeccuja inginga condase'fa, ñoa'me su'chove canjaëne. <sup>4</sup>Tsa'caen canjaëne, Chiga tise'pama fuitesi, sefacconi'su canjaen'choma, ccushaen'choma, agattoen'choma'qqe canjaensi a'ija can'boemba in'jan'fa. Toya'caen ma'caen Chigaja in'jamba Tise Qquendya'pai'ccu Tisema in'jan'chondeccuma in'jaen. Nane ma'caen in'jaen'nijan Chiga tson'chove tson'fa tansintsse condase'chove canjaëne.

### Jesúsja a'ive da

<sup>5</sup>Cuna andeve agattoña'chone gi que'inga condase'je. Tsa cuna andema mandasundeccuta Chigama sefacconi'su shondosundeccu'bi tsu. <sup>6</sup>Nane Chiga Tevaen'jeni qqen tsu tayopi'su David Chiganga su:

¿Jongoesu tsu va ande'su a'ija?

¿Jongoesune qui tisema in'jan'jen?

¿Jongoesu tsu va ande'su tsandieja?

¿Jongoesune qui tisema in'jamba coira'je?

<sup>7</sup>Nane re'riccone qui

Quema sefacconi'su shondosundeccumu utu'cco've a'ima tson.

Tsa'ma tsa'caen tsomba qui

tisenga otifaenquua'caen ñotsse afapa ti'tsse'tssia na'suve tson.

Toya'caen Qui tisema ccutsian

pa'tssi que agattoen'choma mandaye.

<sup>8</sup>Nane tiseja osha'chone na'su tsu.

Tevaen'su suquua'caen Chigaja a'ima tsa'caen osha'chone na'suve ccutsiamba ñoa'me pa'tssima tisenga afe na'suve dapa mandaye. Tsa'ma ja'ñomatsse tsu a'ija toya pa'cco Chiga agattoen'choma manda'je'fambi. <sup>9</sup>Manda'je'fambi'a'qqe gi in'jan'fa Jesúsma. Nane Jesúsja sefaccone jipa re'riccone Chigama sefacconi'su shondosundeccumu utu'cco've dapa paqqe'su a'ive da. Chiga a'ima in'jamba mandasi Tiseja poi a'i egae tsincon'choma joqqitssiaë pa. Tsa'caen pasi tsu Tisenga otifaenquua'caen ñotsse afapa joccapitssia Na'suve tson.

<sup>10</sup>Nane osha'cho jinchoja Chiga Quitsa in'jamba agattoensi jincho tsu. Tiseja in'jan poi'cco Tise dutssiyendeccuve da'chondeccu Tise ñotssiamu isu'faye. Tsa'caen in'jamba Chigaja antte Tise moen'cho Na'suja vana'jemba tsangae ñotssia Ccushaen'suve daye. <sup>11</sup>Nane Jesúsja ingima ccushaemba ño'ame tson'su tsu. Ingija ccushapa ño'ame da'chondeccu gi. Jesucristoi'ccu gi fae yaya'su'fa. Chiga Quitsa ingi yayasi Chiga Dutssi'yeja ansangembi tsu ingima afaye: “Ña quinshingendeccu.” <sup>12</sup>Nane cca'tti Chiga Tevaen'jenga Dutssi'yeja Chiganga qqen su:

Quene gi ña quinshingendecunga condaya.

Poiyi'cco bo'fasi ña'qqe gi Quene avujatsse settapoëña.

13Toya'caen cca'ttinga tsu su:

Ñajan Chigave in'jamba gi

Tisenga tisuma antte.

Toya'caen tsu su:

¡Ñama cambia Chiga ñanga afe'cho dushundecuma'qqe canjan!

14Poiyi'cco ingi Tise dushundeccu gi fae naccu'fa. Papa congongque'su'fa gi. Tsa'cansi Jesús'qqe papa congongque'su a'ive dapa pa ingima fi'tti'suma tsangae patsuye. Nane tsa fi'tti'suja cocoya na'su Satana tsu. 15Aindeccu paye dyojosi Satanajan pa'cco a'i canseite tise'pama an'biamba manda'je. Tsa'ma Jesús Satanama patsusi tiseja a'ima ti'tsse dañõe oshambi. Tsa'cansi aindecuaja ccushapa dyombi'tsse canse'fa. 16Ñoa'me Jesúsja Chigama sefacconi'su shondo'suve dambi tsendecuma fuiteye. Tsa'ma Abraham dutssiyendeccu'suve da a'ima fuiteye. 17Nane ingima ccushaeñe tsu Jesúsja ñoa'me a'i'ccu fae'ngatssia've da. Tsa'cambiecan'da tsu a'ima ccushaeñe oshambiye'can. Tsa'ma tsa'caen dapa tsu ñoa'me a'ima mende'yeye osha. Tsa'caen a'ima mende'yepa tise'pane tansintsse Chiganga afa'su na'su tsu. Toya'caen a'i'ccu fae'ngatssia've dapa tsu papa pa'cco Chiga a'ine in'jan'chove tson a'i egae tsincon'choma tsangae joqqitssiañe. 18Nane Jesús a'ive dasi Satanajan tisema qqeña qqen tson'ma oshambi. Jesúsja tsa'caen vana'jemba patsupa cca'i tsa'caen vanasundecuma'qqe fuiteye osha.

### Jesúsja Moisésma ti'tsse'tssia tsu

**3** 1Tsa'cansi faenga'su Chigave in'jan'chondeccu, Chiga Quitsaja que'ima'qqe Tisunga ttu'se. Tsa'caen ingima ttu'sesi gi ti'tsse Jesúsne asi'ttaemba atesu'faya'cho. Tise've in'jamba gi atesu'fa: Tiseja Chigane inginga afa'su tsu. Toya'caen Chiganga ingine afa'su tsu. 2Nane Chiga tsa'caen tisema ccutsiansi tsu Jesúsja Chiga in'janquia'caen tson. Tayopi Chiga mandasi Moisésja Chiga aindecunga tansintsse manda. Moisés ñotsse pañamba tsonquia'caen tsu Jesús'qqe Chigama ñotsse pañamba tson. 3Tsa'ma Jesúsja Moisésma ti'tsse'tssiasi tisene tsu bove ñotsse afa'faya'cho. 4Nane a'i tsu tsao'ña'fa. Tsa'o ñotsisi cca'indeccuaja tsane ñotsse afapa tsaoña'sune bove ñotsse afa'je'fa. Tiseja na'su tsu. Tsa'cansi Jesúsja Moisésma ti'tsse'tssia tsu. Moisésja aquia a'i tsu. Tsa'ma Jesúsja a'ive agattoen'su tsu. Toya'caen Chigaja pa'tssine Na'su tsu. 5Chiga mandasi Moisésja Chiga aindecui'ccu can'jemba Chiga in'janquia'caen tson. Chiga jai'ngae a'inga ñotsse condaseya'chone atesiamba canjaen. Tsa'camba tsu Moisésja ñotssia shondo'su. 6Tsa'ma Cristoja Na'su Chiga Dutssi'ye tsu. Chiga tisema na'suve tsonsi tsu poiyi'cco Chiga aindecuma tansintsse manda. Nane ingija tise've in'jan'da tise a'i'fa gi. Tsa'camba jinge Jesús jiya'ngae dyombi'tsse ingi ccushaya'chove ron'dapa avujatsse can'jen'faye.

### Tsangae opatsse can'jeña'cho

7-8 Tsa'cansi ñoa'me Chiga Qquendya'pa suququia'caen tsu. Qquen tsu Chiga Tevaen'jenga su:

Tayopi'su israendeccuja ñama patsu qquen tsincomba pañañe chi'ga'fa.  
Ja'ño a'ta Chiga Aya'fama paña'da que'i injama'choma  
tsendeququia'caen se'pi'fajama ñoa'me pañañe.

Nane tayopi'su israendeccuja a'i menia can'jemba toequi Egiptoni shandaye in'jan'fa.

Tsa'caen in'jamba Chigama pañambipa injanga Tisema patsu qquen tsincon'fa.

9 Que'i tayopi'su coenzandeccuja tsa'caen a'i menia can'jemba Ñama pañambipa injanga Ñama patsu qquen tsincon'fa.

Ñajan cuarenta canqqe'fave tise'pama ñotsse tsonsi tsu atte'fa.

Atte'ma toya in'jambipa Ñama patsu qquen tsincon'fa.

10 Patsu qquen tsincon'fasi gi Ñajan tsendecuma iyicca'yepa chi'gapa su:  
“Poi a'ta tsu tise'pa injama'choi'ccu Ñame in'jambipa egae tsincon'fa.  
Toya'caen ma'caen canseya'chone Ña condase'choma'qqe atesu'fambi.”

11 Tsa'cansi Ñajan tise'pama iyicca'yepa quia'me su:

“Tsendeccuja Ñai'ccu ca'ni'faya'bi tsu tsangae opatsse caseye.”

12 Chiga tsa'caen susi, faengasundeccu, injama'tse que'i'su majandeccu tise'pa injama'cho egasi Cansia Chigama catipa in'jan'fambisa'ne. 13 Tsa'ma “ja'ño a'ta” Chiga toya iyicca'yembi'te poi a'ta tisupapora candusiamba fae'ngae fuitecco'faja. Fuiteccopa egae tsincon'choma antte'faja, tsuma afopoenququia'caen “Ñotssi tsu” qquen in'jan'fasa'ne. Nane tsa'caen in'jan'da injama'choni qquepa Chigama pañañe osha'faya'bi. 14 Tsa'ma me'ttia'ye Cristone pañamba tise've in'jamba canseqquia'caen tsu ja'ño canse'faya'cho. Nane paya'ngae tise've tsa'caen in'jamba canse'faya'cho. Tsa'caen cansepa gi Chiga dutssiyendeccuve dapa Cristoi'ccu fae'ngae jincho'faya.

15 Qquen tsu Chiga Aya'faja su:

Tayopi'su israendeccuja Chigama patsu qquen tsincomba chi'ga'fa.  
Ja'ño a'ta, Chiga Aya'fama paña'da que'i injama'choma  
tsendeququia'caen se'pi'fajama ñoa'me pañañe.

16 Tsa'caen susi ¿majan tsu tsa'caen Chiga Aya'fama paña'ma in'jambipa Chigama patsu qquen tsincon'fa? Ju, poiyi'cco Moisés angacansi Egipto andene sombopa jacansundeccu tsu tsa'caen tsincon'fa. 17 Toya'caen ¿majama tsu Chigaja cuarenta canqqe'fa pa'cco iyicca'yepa ñombi'ye? Ju, poiyi'cco egae tsincomba a'i menia pa'fa'chondeccuma tsu Chigaja tsa'caen iyicca'ye. 18 Toya'caen ¿majanga tsu Chigata qquenjan ñoa'me su: “Tsendeccuja ñai'ccu ca'ni'faya'bi tsangae opatsse can'jeñe”? Nane toe israendecuyi tsu. Chigama pañañe in'jambisi Chigaja tsa'caen ca'niñe

se'pi. <sup>19</sup>Tsa'cansi gi in'jan'fa tsendeccuja Chigama pañañe chi'gapa Chigai'ccu tsangae opatsse can'jeña'chonga ca'ni'faya'bi.

**4** <sup>1</sup>Tsa'ma Chiga Tisei'ccu ca'nimba tsangae opatsse can'jeñe ñoa'me su'cho toya pasambi'te jinge dyoe'sui'ccu Tise've in'jan'faye. Injama'tse, majan que'i'su shacasi israendeccuma se'piqqua'caen Chiga que'lma'qqe ca'niñe se'pisa'ne. <sup>2</sup>Nane Jesucristone ñotsse condase'choma candusiansi ingi'qqe paña'fa. Tayopi'su a'i'qqe tsa'caen Chiga Aya'fama paña'ma chi'gasi tsa Aya'faja tise'pama fuitembi opatsse can'jeña'chonga ca'ni'faye. <sup>3</sup>Tsa'ma ingija pañamba gi ca'ni'faya Chigai'ccu tsangae opatsse canseye. Nane Chigaja in'jambindequiane qqen su:

In'jambisi Ñajan tise'pama iyicca'yepa ñoa'me su'choi'ccu su:

“Tsendeccuja Ñai'ccu ca'ni'faya'bi tsu tsangae opatsse canseye.”

Qquen supa tsu opatsse can'jeña'chone conda. Nane me'ttia'ye andeve agattointe Chigaja tsa'caen ante cuintsu aindeccu ca'ni'faye. <sup>4</sup>Tsane tsu cca'tti Chiga Tevaen'jenga qqen su:

Seis a'tangae Chigaja pa'tssi Tise in'jan'chove agattoen nanimba ccaqui a'ta opatsse can'jemba dyai.

Qquen susi gi in'jan'fa Chigaja ante a'i Tisei'ccu tsangae opatsse can'jen'faye. <sup>5</sup>Tsa'ma toya'caen tsu su:

Tsendeccuja Ñai'ccu ca'ni'faya'bi tsu tsangae opatsse canseye.

<sup>6</sup>Tsa'caen tayopi'su israendeccuja Moisési'ccu jacamba Chiga Aya'fama paña'ma chi'gapa ca'ni'fambi Chigai'ccu tsangae opatsse canseye. Tsa'ma Chiga ñoa'me su'cho toya pasambisi majan pañasundeccuja toya tsu ca'niña'cho. <sup>7</sup>Tsa'cansi ccase tsu Chigaja ca'niña'cho a'tane condase, “Ja'ño a'ta” qqen supa. Nane omboe tsa tayopi'su Davidma in'jaensi tsu tayo conda'cho Chiga Tevaen'jeni qqen su:

Ja'ño a'ta Chiga Aya'fama paña'da que'i injama'choma se'pi'fajama ñoa'me pañañe.

<sup>8</sup>Nane Josuéja tayopi majan israendeccuma Canaán andenga ca'niansi tsendeccuja Chigai'ccu tsangae opatsse canseya'chonga ñoa'me ca'ni'fambi. Ñoa'me tseni Chigai'ccu ca'nimba tsangae opatsse can'jen'fa'choecan'da tsu Chigaja omboe ccase: “Ja'ño a'ta ca'niña'cho” qqen condambiye'can.

<sup>9</sup>Tsa'cansi ja'ño toya tsu Chigaja in'jan cuintsu Tise aindeccuja Tisei'ccu tsangae opatsse canse'faye. <sup>10</sup>Chigaja osha'chove agattoen nanimba opatsse can'jemba dyai. Tsa'cansi ingi'qqe Tisenga ca'nimba can'jemba Tisia'caen semañe antte'fa. <sup>11</sup>Tsa'camba jinge Chiga in'janquia'caen tson'faye Tisei'ccu tsangae opatsse canseye. Nane tayopi'su a'ija Chiga su'choma paña'ma Chiga in'jambi'choa've tson'fa. Tsa'caen tsomba Chigama cati'fa. Que'i'qqe tsa'caen tson'fajama, tise'pa'caen egae tsincomba Chigama catisa'ne.

<sup>12</sup>Nane Chiga Aya'faja quinsetssipa tsu osha'choma oshacho. Matichi ñoa'me tsuintssiai'ccu nama, tsu'ttama'qqe doñamba attianquia'caen

tsu Chiga Aya'faja ingi injama'chonga ca'nimba ti'tsse pa'ccoma attian. Nane pa'cco ingi injama'cho in'jan'choma in'jamba tsu attian. Ñoa'me ingi injama'cho tsošipie asi'ttaen'choma'qqe tsu a'tatsse attian. <sup>13</sup>Nane Tisenga gi pa'cco ingi tson'chone tansintsse condase'faya'cho. Tiseja poiyl'cco Tise agattoensi jincho'choma atesuchopa caña'jen'nijan ¿ma'caen gi a'tu'faya? Nane Tisenejan osha'cho tsu chu'cco ccuiquua'caen a'tatsse attian'fa.

### Jesúsja ingine Chigama ñotsse afa'su

<sup>14</sup>Jesúsja Chiga Dutssi'yepa joccapitssia ingine Chigama afa'su tsu. Tiseja sefacconi ansundepa tansintsse Chiga Quitsanga ja. Tsa'cansi ingija Jesúsnga ca'ni'fa qqen su'ta jinge anttembe'yi tise've in'jamba canse'faye. <sup>15</sup>Nane ingine Chigama afa'su tsu ingi qqe'choma atesupa ingima mende'yeye osha. Tise'qqe ingia'caen a'ive dapa can'jensi Satanajan tisema'qqe qqeña qqen tson. Tsa'camba Jesúsja egae tsincon'choma patsu'a'qqe tsu ingi qqe'choma injan'jen. <sup>16</sup>Tsa'caen Jesús ingima mende'ye'ninda jinge dyombi'tsse Chigama iñajan'faye. Nane Chigaja ingima ñotsse tsoñe in'jamba tsu ingima mende'yeya. Tsa'cansi gi Tisema dyombi'tsse iñajan'faya'cho. Nane maqui ingi vana'jen'ninda tse'fael'ccuyi tsu Tiseja ingima ñotsse tsomba fuiteya.

**5** <sup>1</sup>Nane poiyl'cco israe'su Chigama afa'su nasundeccuja aquia a'l'fa tsu. Chiga in'jaensi Moisésja tise quindya Aarónma o'tie ttu'se Chigama afa'suve. Omboe tise dushundeccu'qqe aindecune Chigama afa'je'fa. A'i egae tsincomba Chigama ñoquiañe in'jansi tsu Chigama afa'suja a'i afe'choma oque o'raen cuiitsu tsa'caen Chiganga afeye. <sup>2</sup>Tise'qqe ingia'caen a'ipa egae tsincon'choi'ccu vana'jen. Tsa'camba tiseja atesumbindeccuiama, injanga egae tsincon'sundeccuma'qqe iyicca'yembe'yi mende'yeye osha. <sup>3</sup>Toya'caen tise'qqe egae tsincon'chopa a'i egae tsincon'chone afe'choma fi'ttipa oque o'raen'da tsu tisu egae tsincon'chone'qqe fi'ttipa oque o'raeña'cho.

<sup>4</sup>Toya'caen a'ija Chigama afa'su na'suve daye in'jamba injanga tsuma na'suve ccutsiañe oshambi. Tsa'ma Chiga Quitsaja tayopi Aarónma ttu'sepa Chigama afa'su na'suve ccutsianquua'caen tsu ja'ño'su Chigama afa'su na'suma'qqe ttu'sepa ccutsian. <sup>5</sup>Tsa'caeni Cristo'qqe tsuma joccapitssia've ccutsiambi Chigama afa'su na'suve daye. Tsa'ma Chiga Quitsa tsu tisema na'suve ccutsiamba qqen su:

Que qui ña Dutssi'ye.

Ja'ño gi quema atte.

<sup>6</sup>Tsa'caen Chiga Dutssi'yesi cca'tti Chiga Tevaen'jenga tsu tisema su:

Que qui a'ine Ñama afa'suve

dapa tsangae canseya.

Aarón'cambipa qui Melquisedec'caen tsangae canseya.

<sup>7</sup>Tsa'cansi Cristoja a'ive dapa va andeni can'jemba ina'jemba fundondo'e Chiga Quitsama quia'me iñajan. Nane Chiga Quitsayi tsangae paya'cho'ye

tisema ccushaëne oshasi tsu Tisema ññajan. Tsa'caen dyoe'sui'ccu Chigave in'jamba ññajansi Chigaja tisema paña. <sup>8</sup>Nane Jesúsja Chiga Dutssi'ye'a'qqe toya tsa'caen vana, pa'tssi Chiga in'jan'chove pañamba tsoña'chove atesuye. <sup>9</sup>Nane tsa'caen pa'tssi Chiga in'jan'choma vanamba nanimba tsu tsangae ñotssia ccushaen'suve da. Poiyi'cco majan tisema paña'chondeccuma tsu ccushaëne osha. <sup>10</sup>Tsa'cansi tsu Chigaja su: “Jesúsja Melquisedec'caen tsangae a'ine ñama afa'suve dapa canseya.”

### Jesúsve in'jan'choma catijama

<sup>11</sup>Jesúsja Melquisedec'can qquen supa gi osha'choma que'inga condaseye in'jan. Tsa'ma que'ija injama'choni pañañe in'jambisi aiyepa tsu que'ima ti'tsse atesiañe. <sup>12</sup>Que'ija ja'ño bo'tssingae Chiga Aya'fama paña'da atesiansundeccuve tsu da'faya'cho. Tsa'ma ¿ma'caen qui atesiaña? Nane toya shacasi tsu cca'indeccu que'ima atesiaña'cho. Ccase tsu Chiga Aya'fa nafattian'choi'ccu ashaemba que'ima tsa'caen nafattiaña'cho. Nane du'shuja toya aña'choma aña oshambi'ta chochoveyi tsu chochoya'cho. Que'i'qqe tsa'can'fa qui. <sup>13</sup>Du'shu toya chocho'je'cho atesumbiquia'caen que'ija injama'choni toya chu'apa qui ñotsse canseya'chove paña'ma toya tsa'caen tson'fambi. <sup>14</sup>Tsa'ma coenzandeccuja aña'choma aña osha'fa. Tsa'can'fa tsu Cristove in'jamba injama'choni tayo coenquia'caen ñotsse canse'chondeccuja. Nane tsendeccuja ega've atesupa chi'gapa ñotssiam a tesupa tsomba tise'pa injama'choma tsa'caen ñoña'fa.

**6** <sup>1</sup>Da'su, jinge toe ashaembani'su Cristone atesian'jen'choma ccase afambipa, ti'tsse joccaninga ja'cca'faya. Pa'cco ashaembane injienge'cho, osha'cho tsa ingima fi'ttiya'cho egaie tsincon'choma catipa Chigave in'jaña'cho qui tayo in'jan'fa. <sup>2</sup>Toya'caen Cristove in'jamba fetiyeya'cho, tivei'ccu pporaensi Chiga Quendya'pa in'jan'chone, pa'chondeccu ccase qquendyaya'cho, jain'gae Chiga injama'choma somboeña'chone qui tayo atesu'fa. <sup>3</sup>Tsa'ma ja'ño jinge'su Chiga fuite'choi'ccu ja'ñaccaye cuna atesian'choma.

<sup>4</sup>Nane a'ija Chiga Aya'fama pañamba Cristove in'jan'da Cristoi'ccu canseye atesu'fa. Noa'me Chiga Qquendya'pa tise'pama in'jaemba fae'ngae tise'pa injama'choni can'jen. <sup>5</sup>Chiga Aya'fa ñotsse condase'choma pañamba “Ñotssi tsu” qquen in'jan'fa. Chiga tsangae osha'choma oshachopa jai'ngae mandaya'chove tsu atesu'fa. <sup>6</sup>Tsa'ma tsa'caen in'jamba Jesúsma cati'ta ñoa'me tsu ccase tisu ccushaye oshambi. Poiyi'cco a'i caña'jen'fa'ni Jesúsma avuja'cconga otiquia'caen tisema tsa'caen chi'ga'ta tisuma tsu Cristone tsangae joquittsian.

<sup>7</sup>Nane tsa'candequijaja a'i nasipoen'cho andecan'fa tsu. Unjin tsa andenga tui'ñaccasi sho'yopa ñotsse na'ninda tsu na'suja pi'shopa aña. Nane Chiga mendel'yepa afesi tsu ñotsse naña. <sup>8</sup>Tsa'ma tsa ande aquia nopa'siveyi sho'yo'ninda a'ija tsa andema ti'tssecan'ñi catipa tsu ñoa'me oqueya.

### Chiga su'choma ronda'je'cho

<sup>9</sup>Tsa'ma ñotsse in'jan'chondecu, tsa'caen catiyeya'chone condasepa gi que'ine tsa'caen in'jambi. ¡Que'ine gi bove ñotsse in'jan! Que'lja tayo ccushapa que'i ñotsse tson'choi'ccu tsane canjaen'fa. <sup>10</sup>Nane Chiga Quitsaja egambi tsu. Aqqe'paya'bi tsu que'i Tise've in'jamba cca'lma fuite'je'choma. Que'lja tayo Tise aindecuma in'jamba fuitapa toya qui tsa'caen tson'jen'fa. <sup>11</sup>Toya'caen gi in'jan'fa que'i poiyl'cco tsa'caen in'jamba canjaenquia'caen Cristo ccase jiya'chove ronda'jepa tise jiya'ngae tsa'caen avujatsse canjaen'jen'faye <sup>12</sup>noe'sie dasa'ne. Nane Chiga ñotssiamas isu'je'chondecunga ma'de'faja. Tsendecuja Chigave in'jamba Tise tsoñe su'choma in'jamba anttembe'yi opatsse ronda'jepa tsu Chiga ñotssiamas isu'je'fa.

<sup>13</sup>Tayopi Chiga Quitsaja Abrahamnga ñoa'me tsoña'chone condase. Tise su'choja ñoa'me su'cho qquen canjaeñe in'jansi faesu Tisema ti'tsse'tssia've me'i'on tsu, Tise su'choja ñoa'me su'cho qquen suye. Tsa'caen me'i'onsi Chiga Quitsaja tsuma ñajanquia'caen qquen <sup>14</sup>ñoa'me su: “Ñoa'me gi ñajan quema ñotsse tsoña.” Toya'caen: “Ñoa'me gi ñajan quenga dutssi'yeve afesi qui tsain'bitssia a'ive atapaya.” <sup>15</sup>Tsama pañamba Abrahamjan in'jan. Ccashe'yeve da'a'qqe toya tsu opatsse ronda'jepa Chiga suquia'caen tise dutssi'ye Isaacve isu.

<sup>16</sup>Nane a'lja tise su'cho ñoa'me su'cho tsu, qquen canjaeñe in'jamba tisema ti'tsse joccapitssia'ma ñajan'fa cuintsu tsaja “Ju, tsa'caen tsu” qquen suye. Majan ti'tsse joccapitssia tsa'caen su'nijan poiyl'cco tsu ñoa'me su'choma in'jan'fa. Tsangae tsu afacco'fa'choja pasaya. <sup>17</sup>Tsa'caen Chiga Quitsa'qqe Tise in'jan'choma bove ñotsse canjaeñe in'jamba Tisuma ñajanquia'caen “Ju, tsa'caen tsu” qquen ñoa'me su. Tsa'caen susi jai'ngae Chiga su'choma isuya'chondecuja “Chigaja afopoembipa Tise su'choma cambiambel'yi tsu tsoña” qquen tsu in'jan'faya. <sup>18</sup>Chiga su'choja ñoa'me tansintse su'cho tsu. Toya'caen Chigaja “Ju, tsa'caen tsu” qquen supa ¿ma'caen tsu ccaningae tsoña? Nane Chigaja afopoeñe oshambi. Tise tsa'caen afa fuitesi gi ti'tsse Tise've in'jamba canse'fa. Ñoa'me Cristonga catsepa gi tise ccushaeñe qquen su'choma in'jamba tsave ronda'je'fa.

<sup>19</sup>Tsa'caen in'jamba gi ingi injama'choni opatsse canse'fa. Nane shavoma ta'etsse tandan dusiansi ttuin jambiquia'caen ingija tsa'caen injama'choi'ccu ta'etsse Jesúsve in'jan'fa. Tsa'caen in'jamba, Sefacconi'su Chiga etti'su sombo'ttima picco'je'cho sarupama pashanquia'caen gi Chigani ca'nimba can'jemba Tise'ye ttuin ja'faya'bi. <sup>20</sup>Nane Jesúsja ingima o'tie Chiga sefacconga ca'ni ingima'qqe Chiganga angaye. Tsa'camba Tiseja Chigama afa'su Melquisedec'caen tsangae ingine Chigama afa'su tsu.

### Jesúsja Melquisedec'caen tsangae ingine Chigama afa'su tsu

**7** <sup>1</sup>Ñoa'me Jesúsja va ingi su'cho Melquisedec'can tsu. Melquisedec tayopi can'jemba Salém canque'su na'su tsu. Tiseja aindecune Joccapitssia Chiga

Quitsanga afa'su tsu. Tayopi'su israe'su coenza Abraham'qque tsaite can'jemba faesu canqque'su nasundecuma geraemba patsupa fitti'tti. Fitti'ttipa toequi jiñasi Melquisedec jipa tisema cachui. Cachuicopa Melquisedecja Abrahamne Chigama afa cuintu ñotsse tsoñe. <sup>2</sup>Toya'caen Abrahamjan osha'cho geraemba itsa'choma attufaemba fae decimoveyi Melquisedecnga afe. Nane “Melquisedec” qquenda tsu “Ñotsse tson'jen'cho na'su” qquen su. Toya'caen “Salém” qquenda tsu “Opatsse canseye in'jan'cho” qquen su. Tsa'cansi tiseja Salém canqque'su na'supa “Opatsse canseye in'jan'cho na'su” tsu. <sup>3</sup>Tise yaya, tise mamane Chiga Tevaen'jen condambi. Tise tayopi'su antiandecune ni tise dushundecune tevaembi tsu. Ni tisema isu'cho a'ta ni tise pa'cho a'tane tsu condambi. Tsa'ma Chiga tisema ttu'sepa ccutsiansi tsangae tsu tiseja Chigama afa'su. Tsa'camba tsu Chiga Dutssi'ye aindecune Chigama afa'suve dapa tsangae can'jeña'choma canjaen.

<sup>4-5</sup>Notsse in'jan'faja. Ingi tayopi'su coenza Abraham can'jemba pasi tisema omba'su israe aindecu'su Leví dutssiyendeccu tsu Chigama afasundecuve da'fa. Chiga mandasi tsu poi israendeccu an'bian'choma enttingeve fae decimoveyi Chigambe isu'fa. Nane poi israendeccu tise'pa antiandeccu tsu. Tise'pa'qque Abraham omba'su dutssiyendecusi toya tsu tsendecumbema'qque Leví a'ija tsa'caen isu'fa. Tsa'ma Chigama afa'su Melquisedecja joccapitssia tsu. Joccapitssiasi ingi tayopi'su coenza Abrahamjan tisu geraemba ñotssiana itsa'choma attufaemba decimove Chigambe Melquisedecnga afe.

<sup>6-7</sup>Nane in'jan'fa gi fae a'i faesune Chigama ñotssiave afa'su'ta tsa a'ija faesuma ti'tsse'tssia tsu. Nane Chigaja ñoa'me su'choma Abrahamnga condasesi Abrahamjan joccapitssia tsu. Tsa'ma Melquisedecja Abraham omba'su du'shu Leví a'imbipa ni Leví a'i'su Chigama afa'sumbipa tise'pama ti'tsse'tssia tsu. Toya'caen Melquisedec Abrahambema decimove Chigambe isupa tisene Chigama ñotssiave afapa ñoa'me tsu tiseja Abrahamma ti'tsse joccapitssia. <sup>8</sup>Levisundecuja a'ine Chigama afasundecupa decimove Chigambe isu'jepa can'jemba pa'fa. Tsa'ma Melquisedec decimove Chigambe isupa can'jemba joqqutssiambipa toya cansequia'can tsu. Tsa'caen tsu Chiga Aya'fa tisene condase. <sup>9-10</sup>Nane Levisundecuja decimove Chigambe isu'fa. Tsa'ma tise'pa toya meinte coenza Abrahamjan Melquisedecma cachuipa decimove Chigambe tisenga afesi tayo tisei'ccu fae'ngae jinchoquia'caen tise'pa'qque fae'ngatsse afe'fa. Nane tsa'caen tsu ccash'e'ye Abrahami'ccu fae'ngae jinchoquia'caen tisei'ccu fae'ngae canjaen'fa Melquisedecja ti'tsse'tssia.

<sup>11</sup>Chigaja Aarónma Tisema afa'su na'suve ccutsian. Tisema ccutsiamba tise dutssiyendecuma'qque, tsa Levisundecuma, Tisema afasundecuve ccutsian. Tise'pai'ccu manda'choma manda cuintu aindecuja tsama pañamba tson'da ño'ame da'faye. Tsa'caen mandasi aindecu tsa'caen ccushapa tsangae ño'ame da'fa'choecan'da Chigaja Jesúsma Tisema afa'suve ccutsiambiye'can tsu. Toya'caen ¿micomba tsu Jesúsma Levisundeccu'su Aarón'cambipa

Melquisedec'caen Chigama afa'su na'suve ccutsian? <sup>12</sup>Nane Chigaja tsa'caen Jesúsma Aarón'cambi'choa Chigama afa'suve ccutsiamba tsu manda'choma cambiaña'chove'qqe canjaen. <sup>13-14</sup>Toya'caen Jesúsja israe'su Leví a'imbipa ñoa'me faesu israe'su a'i tsu. Nane poiyyi'cco gi atesu'fa ingi Na'su Jesucristo tsu israe'su Judá a'i. Judá aindeccuja Chigama afasundeccumbi. Moisésja Judá'su aindeccune ñoa'me mandambi cuintsu tsendeccu Chigama afa'suve ca'ni'faye.

<sup>15</sup>Ja'ño gi a'tatsse in'jan'fa Chigaja ccaningae tson'jen. Cristoja Melquisedec'caen Chigama afa'suve dapa ccutsupa ccaningae tson'jen'choma tsu canjaen. <sup>16</sup>Tayopi'su Chigama afasundeccune manda'choja manda Leví aindeccu'suveyi tsu Chigama afasundeccuve ccutsiaña'cho. Tsa'ma Jesúsja tsesu aindeccu'sumbipa papa ccase qqwendya'pa pa'masiave dapa tsangae ñotsse Chiganga afa'suve da. <sup>17</sup>Tsane tsu Chiga Aya'faja qqen su:

Que qui a'ine Ñama afa'suve  
dapa tsangae canseya.

Aarón'cambipa qui Melquisedec'caen tsangae canseya. <sup>18-19</sup>Tsa'cansi gi in'jan'fa o'tien'su Chiga manda'choja oshambi a'ima ccushaeñe cuintsu Chiga in'janquia'caen tsangae ño'ame da'faye. Nane tsa manda'choja shacapa oshambisi tsu tsama cati. Catisi gi bove ñotsse ccushaeña'chone paña'fa. Tsai'ccu gi ño'ame dapa dyombi'tsse Chiganga catse'fa.

<sup>20</sup>Chigaja cambia'masia su'choi'ccu cuna ccushaeña'chone condase. <sup>21</sup>Tayopi Chigaja Levisundeccuma Chigama afa'suve ccutsian. Cambia'masia su'choi'ccu tise'pama ttu'sembi. Tsa'ma cambian'masia su'choi'ccu Jesúsma ttu'se. Jesúsne tsu Chigaja qqen su:

Na'suja ñoa'me supa ccaningae tsoña'bi.  
Que qui a'ine Ñama afa'suve  
dapa tsangae canseya.

Aarón'cambipa qui Melquisedec'caen tsangae canseya. <sup>22</sup>Tsa'caen Chiga cambia'masiave afasi Tise cuname aindeccui'ccu injancco'fa'cho tsu tayo'su aindeccui'ccu injancco'fa'choma bove ñotssi. Toya'caen Jesúsja injancco'fa'choma canjaen'su tsu. Tiseja canjaen Chiga tsa'caen tsoña'choma. <sup>23</sup>Nane ñoa'me Levisundeccu Chigama afasundeccuve ca'ni'ñaccapa pa'fapa tsain'bio tsu. Afa'suve ccutsupa pasi tsu faesuja ca'ni. Tsa'caen pa'ñaccapa tsangae Chigama afa'suve dapa can'jeñe osha'fambi. <sup>24</sup>Tsa'ma Jesúsja Chigama afa'suve ccutsupa pambe'yi tsu tsangae tiseja Chigama afa'su. <sup>25</sup>Tsa'camba Jesúsja tsangae nanitsse a'ima ccushaeñe osha. Poiyyi'cco majan tise've in'jamba Chiganga catse'nijan tise tsu ccushaeña. Tsangae tsu Jesúsja canse tsendeccune Chigama afaye.

<sup>26</sup>Nane Jesúsyi tsu ingine ñotssia Chigama afa'su na'su. Tiseja Chiga in'janquia'caen ño'a tsu. Tiseja egae in'jambi ni egae tsincombi. Tsa'camba tsu tiseja ingi egae tsinconsundeccuma ccaninga'o. Toya'caen tiseja joccapitssia've dapa Chigai'ccu sefacconi can'jen. <sup>27</sup>Nane Jesúsja cca'i Chigama afa'su nasundeccu'cambi tsu. Tsendeccuja poi a'ta

tsu Chiganga afe'cho anjampama afe'faya'cho, egae tsincon'choma joqqittssiaña'chove ñajañe. O'tie tisupa egae tsincon'chone ñajamba tsu omboe aindeccu egae tsincon'chone'qqe tsa'caen ñajan'faya'cho. Tsa'ma Jesúsja tsendequua'cambipa fae seyi Chiganga afe'cho anjampama afe poiyl'cco a'ima nanitsse ccushañe. Nane tsuma tsu afe avuja'cconga papa a'i egae tsincon'choma tsangae joqqittssiañe. <sup>28</sup>Nane tayo'su manda'cho mandaquua'caen egae tsinconquue'su a'i tsu Chigama afa'su nasundeccuve da'fa. Tsa'ma omboe Chiga Quitsaja tayo'su manda'choma joqqittssiamba cambia'masia su'choi'ccu Tise Dutssi'yema ccutsian a'ine Chigama afa'suve. Tiseja tsangae egae tsincon'masiapa tsangae tsu canse a'ine Chigama afaye.

### Jesúsja bove ñotsse ccushaen'su tsu

**8** <sup>1</sup>Tsa'caen condasepa gi qqen suye in'jan: Jesucristoja ingine ño'a Chigama afa'su tsu. Chiga sefacconi can'jemba na'suve dapa Chiga tansinfani dyaipa manda'je. Tseni can'jemba ingine Chigama ñotsse afa'je. <sup>2</sup>Nane ingi tayopisundeccuja a'i menia can'jemba carpama ccutsian'fa Chiga tise'pai'ccu fae'ngae can'jen'chove canjañe. Tse'ttinga tsu Chigama afa'fa. Tsa'ma Jesúsja Chiga sefacconi Chigai'ccu can'jemba cambajunaccu tansintsse ingine ñotsse afa'je. Tseni tsu ñoa'me Chigai'ccu cachuicco'je'cho.

<sup>3</sup>Nane poiyl'cco Chigama afa'su nasundeccu tsu Chiganga afe'cho ovejama fi'ttipa anjampama afe'faya'cho Chigama ñajañe. Tsa'cansi Jesús'qqe Chigama afa'suve dapa tisu afeya'choma tsu an'biaña'cho. <sup>4</sup>Tsa'ma tise toya va andeni can'jen'choecan'da tsu Chigama afa'suve daye oshambiye'can. Nane tayo'su manda'cho mandaquua'caen Leví a'i Chigama afasundeccu vani can'jemba Chiganga afe'choma afe'fasi tsu tsa'caen oshambiye'can. <sup>5</sup>Nane tsendeccuja manda'cho mandaquua'caen Chigai'ccu cachuicco'je'cho carpani ca'nimba osha'cho tson'choi'ccu Chigama ñajan'fa. Tsa'ma pa'cco tise'pa tson'jen'choja Chiga sefacconi jinchoma tsu a'inga canjaen. Jesús jai'ngae Chiga sefacconi ingine Chigama ñajaña'choma tsu canjaen. Nane tsa'camba tayopi Moisés Chiga a'i'ccu cachuicco'je'cho carpave ñoñañe tson'jensi Chigaja ccotta'cconi Moisésnga su: “Ña ja'ño quenga canjaen'choma ñotsse injan'jemba pa'ccoma tsa'cantsse Ña can'jeña'cho carpave ñoñajan.” <sup>6</sup>Tsa'ma Chigaja ja'ño cuname a'i'ccu fae'ngae injancco'fa'choma afapa bove ñotsse tsoña'chone tsu afa. Tsa'cansi cuname fae'ngae injancco'fa'cho tsu tayo'su injancco'fa'choma ti'tsse ñotssi. Tsa'caen cuna tayo'suma ti'tsse ñotssi quua'caen tsu ingine Chigama afa'su Jesucristoja Levisundeccuma ti'tsse ñotssia ñoquian'su. Nane Jesucristo tsu ti'tsse ñotsse injancco'fa'choma ñoquian'su.

<sup>7</sup>Nane Chigaja o'tie a'i'ccu fae'ngae injancco'fa'choma condasesi aindeccu paña'fambisi tise'pa injama'choma ñoñañe oshambi. Tsa injancco'fa'cho ñotssi qqen in'jamba poiyl'cco a'i paña'choecan'da ñoa'me Chigaja ccaningae a'i'ccu injancco'fa'choma tsu condambiye'can. <sup>8</sup>Tsa'ma a'ija paña'ma injama'choni shaca'fasi Na'su Chigaja in'jamba tise'pane qqen su:

- Jai'ngae gi cuname fae'ngae injancco'faya'choma condaya.  
 Israendeccui'ccu, Judándeccui'ccu gi tsa'caen fae'ngae injancco'faya.  
 9 Tsaja ña o'tie a'i'ccu fae'ngae injancco'fa'choa'cambi tsu.  
 Tayopi tise'pa coenzandeccui'ccu fae'ngae injanccopa gi  
 tise'pama anga Egipto ande'ye somboeñe.  
 Tsa'ma ñama paña'ma in'jan'fambisi gi  
 tise'pama ccane'qqe pañambi –qqen tsu Na'suja su.  
 10 Tayopi'su a'i pañambisi gi  
 jai'ngae poi'yi'cco ñame in'jan'cho israendeccui'ccu tsa'caen  
 fae'ngae injancco'faya –qqen tsu Na'suja su.  
 Ña tise'pama in'jaensi tsu  
 injama'choi'ccu ña in'janquia'caen in'jamba tsa'caen ñotsse tson'faya.  
 Injama'choni ñame in'jamba  
 tsu ña a'ive da'faya.  
 Ñajan tise'pa Chiga gi  
 tise'pai'ccu can'jeña.  
 11 Nane tayoe a'ija tisupapora atesian'fa.  
 Quindya tsu tise quinshima nafattian  
 cuintsu Na'su Chigave in'jañe.  
 Tsa'ma tsequi a'ta poi'yi'cco pañamba ñame in'jansi  
 majameñi'qqe atesiañe me'i'on tsu.  
 Nasundeccu, utu'ccoandequia'qqe tsu ñame in'jan'faya.  
 12 Nane tise'pama mende'yepa gi  
 tise'pa egae tsincon'choma agattoya'bi.  
 Tise'pa shacama gi aqqe'paya.  
 13 Na'su Chigaja tsa'caen tise a'i'ccu cuname fae'ngae injancco'fa'choma  
 condasepa tayo'su a'i'ccu fae'ngae injancco'fa'choja tssoruve dasi  
 tayo joqqitssian qqen tsu su. Nane tsangae can'jembi'choa tsu  
 joqqitssique'su. Junde tsu tsaja tsangae catiyeya.

### Chigai'ccu cachuicco'je'cho

9 <sup>1</sup>Me'ttia'ye Chigaja tise a'i'ccu fae'ngae injancco'fa'choma condapa  
 pa'tssima ma'caen Tisema iñajañe'qqe a'inga conda. Condasi a'ija  
 Chigai'ccu cachuicco'je'cho carpa tsa'ove tsao'ñamba tseni Chigama  
 iñajan'fa. <sup>2</sup>Tsa carpa tsa'ove dos cuartoi'ccu tsu tsao'ña'fa. Cani'jen'cho  
 cuartoni tsu tuñoma ccutsian'cho jin. Toya'caen mesa'qqe tsu jin. Tsa  
 mesanga tsu poi avujaqui Chiganga afe'cho panma ccuiña'jen'fa'cho. Tsa  
 cuarto tsu Chiganga catsey'a'cho cuarto. <sup>3</sup>Faesu sarupa piccol'je'choma  
 panshamba tsu enttinge'su cuartonga ca'niña'cho. Tsaja ñoa'me Chigai'ccu  
 cachuicco'je'cho cuarto tsu. <sup>4</sup>Sarupa piccol'je'cho jin'tti tsu corima  
 ñoña'chonga si'ngema oque'je'cho jin. Tseni tsu ñome'bama ccuiñamba  
 Chiganga oque oraen'jen'cho.

Toya'caen Chiga a'i'ccu fae'ngae injancco'fa'chove canjaen'cho cafon'qqe tsu tsa enttinge'su cuartoni jin. Tsa cafonjan pa'cco cori'ccu oppoen'cho tsu. Nane sepaccofama naccufama'qqe cori'ccu oppoen'cho tsu. Cafoni tsu cori api ppi. Nane tsa apini tsu Chiga a'inga afe'cho pan'can maná ppi. Toya'caen Aarón accuicco'cho'qqe tsani ccui. Tsaja quini'cco samba sho'yo'cho tsu. Sho'yopa tsu Chiga Aarónme in'jan'chove canjaen. Toya'caen Chiga a'i'ccu fae'ngae injancco'faye manda'choma tevaen'cho patu'qqe tsani ppi. <sup>5</sup>Cafon ombani tsu corima ñoña'cho piccofin'di otta. Tsambe omba'ye Chigaja a'ima cachuiccopa mende'yepa tise'pa egae tsincon'choma joqqitssian. Toya'caen tsambe ombani tsu dos Chigama sefacconi'su shondosundequua'caen corima ñoña'cho jin. Coira'jequua'caen tsu Chiga a'ima mende'yepa cachuicco'je'chombe ombama tise'pa sanccopai'ccu oppoen'cho'fa Chiga can'jen'choma canjaeñe. Tsa'ma tsesu jincho'chone gi ja'ño ti'tsse atesiañe oshambi.

<sup>6</sup>Chiga tsa'caen ñoñañe mandasi ñoñamba tsu tse'ttinga Chigama iñajan'jen'fa. Nane poi a'ta tsu Chigama afasundeccuja Chiganga catseya'cho cuartongayi cani'jen'fa tise'pa Chigama iñajan'jen'cho sema'bama tsoñe. <sup>7</sup>Tsa'ma enttinge'su Chigai'ccu cachuicco'je'cho cuartongaja Chigama afa'su na'suyi tsu fae canque'fanga fae seyi ca'niñe osha. Toya'caen tsa'caen ca'ni'da tsu anjampa tssan'choma angaya'cho. Nane tsai'ccu tsu tisu egae tsincon'chone Chigama iñajamba omboe aindecune'qqe Chigama iñajan cuintsu Chiga tise'pa egae tsincon'choma'qqe joqqitssiañe. <sup>8</sup>Tsa'cansi tsu aquua a'ija ca'niñe osha'fambi. Chiga Qquendya'paja tsa'caen se'pipa ingima qqen canjaeñe in'jan: Chiganga catseya'cho cuarto toya ccutsu'nijan a'ija toya tsu tayopi mandaquua'caen Chigama iñajaña'cho. Toya tsu Chigama tansintsse cachuiccoye osha'fambi. <sup>9</sup>Nane pa'cco va ña que'inga condase'choja inginga canjaen'cho tsu. Ja'ño a'ta toya tsu a'ija chivo, vaurama'qqe fi'ttipa afe'je'fa cuintsu Chiga tise'pa egae tsincon'choma joqqitssiañe. Tsa'ma a'ija Chigai'ccu cachuicco'je'cho cuartonga toya ca'niñe oshambipa tise'pa injama'choja giya'tssimbisi tisupa egae tsincon'choma toya aqqe'paye osha'fambi. <sup>10</sup>Nane osha'choma fi'ttipa afe'choja aquua a'i asettupa tson'cho tsu. Anque'sune, cui'qqe'sune, onjoña'chone'qqe tsu asettuye manda. Tsa'ma Cristo jiya'ngaeyi tsu tsa'caen tsincon'fa ñotsse canseye qqen in'jamba.

<sup>11-12</sup>Tsa'ma ja'ño Cristoja tayo jipa pa'cco Chiga a'inga ñotsse tsoñe su'choma nanitsse tson. Ingene Chigama afa'su tsu. Tiseja a'i ñoña'cho carpanga cani'jembi Chigama afaye. Ni chivo ni vaura du'shuma fi'ttipa tsambe anjampama afe'ñaccambi egae tsincon'choma joqqitssiañe. Tsa'ma tisu anjampai'ccu Chiga bove ñotssia can'jen'chonga tansintsse ja. Nane Tise can'jenijan osha'cho vani jinchoma ti'tsse ñotssia tsu. Tseni japa can'jemba Agattoen'su Chiga Quitsanga cambajunaccu ingine afa'je. Nane

pasi tise anjampa tssansi tsu fae seyi nanitsse ingi egae tsincon'choma tsangae ccuchapa joqqitssian. <sup>13</sup>Nane a'ija pa'chombe ai'voma pporaen'da, ñoa'me tsu cca'indeccui'ccu bopa Chigama ñajañe oshambi. Ccase cca'i'ccu boye in'jan'da tsu Chiga manda'cho mandaquia'caen chivoma iya'cho. Tsambi'ta vaura quitsayema iya'cho. Jongoesuma isi fi'ttipa Chigama afa'su tsu tsambe anjampai'ccu afe'sunga bitssaen tsai'ccu tise asettu'choma giyaëne. Toya'caen vaura du'shu pushema'qqe fi'ttipa oque oraemba tsambe cusepama afe'sunga shequiaña'cho. Tsa'caen tise asettu'choma giyaensi ccase tsu tsaja cca'indeccui'ccu bopa Chigama ñajañe osha. Tsa'caen tsesu giyaëne bare'ninda <sup>14</sup>ñoa'me tsu Cristombe anjampaja ti'tsse bare. Cristoja egae tsincon'masia. Tsangae Jincho'cho Chiga Qquendya'pa tisema quiñaensi se'pimbe'yi, ñotssia oveja sintti'ccoave mechoquia'caen, tsuma Chiganga afeye pa. Papa tisu anjampai'ccu ingi injama'cho egae tsincon'choma tsangae giyaen. Tsa'caen giyaensi gi tsa egae tsincon'choma aqqe'paye osha'fa. Ingi semamba osha'choma afe'choja ingima giyaëne oshambipa ñoa'me barembi tsu. Tsa'ma Cristo ingima giyaensi gi avujatsse Ñoa'me Cansia Chigama pañamba Tise in'janquia'caen canse'fa.

<sup>15</sup>Chigaja tayoe a'i'ccu fae'ngae injancco'fa'choma condasepa a'ima ttu'se Tise a'ive da'faye. Tsa'ma tsa'caen injanccopa fi'ttipa afe'choja a'ima tsangae ccushaëne oshambisi Chigaja ccase cunama a'i'ccu injancco'faya'choma condase. Cunama condasesi Cristoja ingima ñoquian'suve dapa pa egae tsincon'cho shacama ccuchapa tsangae joqqitssiañe. Tsa'caen pasi tsu tayo'su ttuseye'chondeccu'qqe osha'cho Chiga a'inga ñotsse tsoñe su'choma isuye osha'fa. <sup>16</sup>Nane a'ita tsu atesu'fa toya pambi'te tisu pasi attufaeña'cho tevaen'jema tevaëne. Tsa'cansi tsu “Na'su pa” qqen paña'da ñoa'me atesuya'cho osha'choma attufaeñe. <sup>17</sup>Tevaen'su toya canse'ninda tsa tevaen'jenjan toya barembi tsu isuya'chondeccu tevaen'jen suquia'caen isu'faye. Tsa'ma tsa a'i ñoa'me pasi tise toya pambi'te in'jamba tevaenquia'caen tsu tsoña'cho cuintsu isuya'chondeccu isu'faye. <sup>18</sup>Tsa'cansi Chigaja Tise tayo'su a'i'ccu injancco'fa'choma condasepa anjampama tssañañe manda tayo injancco'fa qqen canjaëne. <sup>19</sup>Qquen tsu Moisésja tson: Chiga mandaquia'caen Moisésja pa'cco manda'choma a'inga condase. Tsomba vaura du'shu anjampa, chivo anjampama'qqe tsa'ccunga tssutssian. Tssutssiamba cu'la oveja tosema canttini'cconga tandamba tssipoen. Tssipoemba tsai'ccu Chiga manda'cho tevaen'jema bitssaen. Toya'caen aindeccunga'qqe bitssaen <sup>20</sup>qqen supa: “Chigaja que'ima in'jamba que'i'ccu fae'ngae injancco'fa'choma condase. Va anjampa tssan'choi'ccu que'i poi'yi'ccoma bitssaensi que'i Chigai'ccu tayo injancco'fa'choma atesu'faja.” <sup>21</sup>Tsa'caen supa Moisésja Chigai'ccu cachuicco'je'cho carpama, pa'cco tseni'su Chigama ñajañe vase'je'choma'qqe anjampai'ccu bitssaemba giyaen. <sup>22</sup>Nane Chiga manda'cho susi ti'tssecan'jan pa'ccoma tsu anjampai'ccu giyaëne'can. Egae tsincon'choma'qqe joqqitssiañe in'jamba tsu anjampama tssañaña'cho. Nane anjampama tssañambian'da Chigaja a'i egae tsincon'choma aqqe'paya'bi.

### Cristoja papa egae tsincon'choma joqqitssian

<sup>23</sup>Nane va ande'su Chigai'ccu cachuicco'je'cho carpa, tsani jincho'qqe sefacconi jinchoma canjaen'cho tsu. Tsa'caen canjaen'ni'qqe toya tsu anjampai'ccu giyaena'cho. Canjaen'choma tsa'caen anjampai'ccu giyaensi tsu sefacconi jinchoma'qqe ti'tsse ñotsse anjampa tssansi afe'choi'ccu tsangae giyaena'cho. Cristo tsu tsa'caen Tisuma afe. <sup>24</sup>Ma'caen Tisunga catsepa cachuiccoya'chove canjaene in'jamba Chigaja a'ima manda cuintsu Tisei'ccu cachuicco'je'cho carpave ccutsiañe. Ccutsiamba tsanga ca'ni'fa Chigama inajañe. Tsa'ma Cristoja tseni ca'nimbipa tansintsse Chiga sefacconi japa tsu Chiganga ccutsupa cambajunaccu ingine afa'je. <sup>25</sup>Toya'caen va ande'su Chigama afa'su na'suja poi canque'fa Chigai'ccu cachuicco'je'cho quartonga cani'jen. Tisu anjampama afembipa chivo, vaura anjampama'qqe afeye cani'jen. Tsa'ma Cristoja tsa'caen cani'jembi ni tsa'caen afe'jembi. Nane tisu anjampa tssansi tsu fae seyi papa Chiga sefaccongá ca'nimba ingima tsangae ccushaen. <sup>26</sup>Tsa'cambiecan'da, ñoa'me tsu tiseja va andeve agattointene pa'ñaccapa vanañe'can tsa'caen poiyi'cco tayopi'su a'i egae tsincon'choma'qqe joqqitssiañe. Tsa'ma ingi atesuquia'caen ja'ño Chiga tayo'su a'i'ccu injancco'fa'cho naningsesi Cristoja fae seyi a'ive dapa pa a'i egae tsincon'choma nanitsse tsangae joqqitssiañe. <sup>27</sup>Nane poiyi'cco a'i tsu fae seyi pa'faya'cho. Tsa'caen pasi tsu Chigaja Tise'pa canseite tsincon'chone afaya. <sup>28</sup>Tsa'caeni tsu Cristo'qqe fae seyi papa tsain'bitssia a'i egae tsincon'cho shacama afepoemba ccucha. Tsa'caen tsomba tsu jai'ngae ccase vani jiya. Ccase egae tsincon'choma joqqitssiañe jiya'bi. Tsa'ma poiyi'cco majan tise've in'jan'chondeccuma ccushaene tsu jiya. Tsendeccuja avujatsse tise've ronda'je'fa.

**10** <sup>1</sup>Coe'je desi osha'cho aya attianquia'caen Chiga manda'choja osha'cho Chiga jai'ngae ñotsse tsoña'chone aquia a'inga attiaña'cho tsu. Tsa'ma aquia attiansi a'ija Chiga ñotssiaive toya isuye osha'fambi. Nane manda'cho mandaquia'caen a'ija poi canque'fa chivo, vaurama'qqe afe'ñaccapa Chigama inajan'fa. Tsa'caen afe'a'qqe toya tsu inajansundeccuja nafi'fambi Chiga in'janquia'caen daye. <sup>2</sup>Nane Chiga in'janquia'caen nepi'choecan'da tsu fi'ttipa afe'choma afeye ántteye'can. Inajansundeccuja tsa'caen tsomba injama'choni giya'tssiecan'da tsu tise'pa egae tsincon'chone asi'ttaemba in'jan'choma aqqe'pafaye'can. <sup>3</sup>Tsa'ma a'ija tise'pa egae tsincon'choma aqqe'paye osha'fambi. Nane poi canque'fa fi'ttipa afe'choma Chiganga afe'ñacca'a'qqe toya tsu tise'pa egae tsincon'cho shacama injan'jen'fa. <sup>4</sup>¿Ma'caen tsu vaura quitsaye anjampa, chivo anjampaja egae tsincon'choma ccuchaya? Tsaja ñoa'me oshambi tsu.

<sup>5</sup>Tsa'caen oshambisi tsu Na'su Cristoja ca'tsa a'ive daye tson'jemba Chiga Quitsanga su:

A'i osha'choma fi'ttipa afe'choma Quenga afeye qui

ja'ñojan in'jaña'bi.

Tsa'ma ñama qui manda  
a'ive dapa tsuma afeye.

<sup>6</sup> Egae tsincon'choma joqqitssiañe a'i osha'choma fi'ttipa  
oque o'raen'choma qui ja'ñojan avujatssiya'bi.

<sup>7</sup> Tsa'cansi ñajan quema pañamba gi su:

“Yaya Chiga Quitsa, ñajan que in'janquia'caen tsoña  
a'i egae tsincon'choma joqqitssiañe.

Nane Que Tevaen'jen ñane suqquia'caen gi tsoña.”

<sup>8</sup> Osha'choma fi'ttipa Chiganga afe'choja tayo'su manda'cho mandaquia'caen  
afe'cho tsu. Osha'cho egae tsincon'choma giyañe oque o'raen'cho'qqe  
tayo'su manda'cho mandaquia'caen afe'cho tsu. Tsa'ma Cristoja su: “Chiga  
Quitsaja ja'ño tsama in'jaña'bi ni tsai'ccu avujatssiya'bi.” Qquen supa ccase  
<sup>9</sup> tsu su: “Yaya, Chiga Quitsa, ñajan que in'janquia'caen tsoña a'i egae  
tsincon'choma joqqitssiañe.” Tsa'caen supa tayoe Chiganga fi'ttipa afepa  
tson'choma catipa tsuma afepa Chiga in'janquia'caen tsoña'choma ashaen.  
<sup>10</sup> Nane Jesucristoja Chiga in'janquia'caen fae seyi tisu anjampa tssansi pa.  
Papa ingima ccushaemba ttu'sesi gi Chiga in'jan'cho aindeccuve da'fa.

<sup>11</sup> Israe'su Chigama afasundeccuja poi a'ta tsu a'i Chiganga afe'choma  
isupa Chiganga afe'fa. Afe'choma fi'ttisi anjampa tssansi tsai'ccu egae  
tsincon'choma ccuchaya qqen tsu in'jan'fa. Tsa'ma tsa'caen afepa ccaqui  
a'ta ccase tsu tsa'caeni fi'ttipa afe'faya'cho. Tsa'caen zutsse afe'ñacca'a'qqe  
ñoa'me egae tsincon'choma tsangae ccuchaye oshambi. <sup>12</sup> Tsa'ma Cristoja  
tisu anjampa tssansi fae seyi pa tayopi egae tsincon'choma, jai'ngae egae  
tsincoña'choma'qqe nanitssse ccuchaye. Tsa'caen pa'ccoma ccuchapa Chiga  
sefacconi japa na'suve dapa Chiga tansinfani dyaipa manda'je. <sup>13</sup> Tseni  
tsu ronda'je poiyl'cco tisema iyiccayesundeccuma patsuya'ngae. <sup>14</sup> Nane  
Jesucristoja fae seyi tsuma afepa poiyl'cco tisenga ttuseye'chondeccuma  
tsangae ño'ame tson. Nane tayopisundeccu'qqe ingi'ccu fae'ngae Cristove  
in'jamba tsangaeyi ño'ame da'fa. <sup>15</sup> Chiga Qquendya'pa'qqe tsane ingima  
tansintssse conda. Nane Chiga Tevaen'jenga qqen tsu Tiseja su:

<sup>16</sup> Tayopi'su a'i pañambisi gi

jai'ngae poiyl'cco Ñame in'jan'chondeccui'ccu tsa'caen  
injancco'faya –qqen tsu Na'suja su.

Ña tise'pama in'jaensi tsu

injama'choi'ccu Ña in'janquia'caen in'jamba tsa'caen ñotsse  
tson'faya.

<sup>17</sup> Taya'caen tsu su:

Tise'pa egae tsincon'choma

agattombipa gi tise'pa shacama aqqe'paya.

<sup>18</sup> Tsa'caen egae tsincon'choma tsangae joqqitssiamba aqqe'pasi tayopi  
fi'ttipa afe'cho tsu tsangae pasa.

### Chigave ti'tsse in'jan'faya'cho

<sup>19</sup>Faengasundeccu, Jesúsja avuja'ccongá tise anjampa tssansi ingine pa. Papa ingi egae tsincon'choma tsangae joqqutssiansi gi dyombi'tsse Chiganga catsepa tisu yayai'ccu condaseccoquia'caen Tisei'ccu condasecco'je'fa. <sup>20</sup>Tayoe a'ija Chigai'ccu cachuicco'je'cho cuartonga ca'niñe osha'fambi. Nane sombo'tti'su sarupa picco'je'choma panshañe osha'fambi Chigama cachuiccoye. Tsa'ma Jesúsja avuja'ccongá papa tisu ai'voi'ccu tsa sarupa picco'je'choma fettaquua'caen tansintsse Chiganga ja. Tise tsa'caen jasi gi ingi'qqe tiseni cansepa cuname Chiganga catseye osha'fa. <sup>21</sup>Jesúsja poiyl'cco Chiga aindeccone Chigama afa'su na'su tsu. <sup>22</sup>Tise tsa'caen ingine afa'ninda jinge tise've in'jamba ti'tsse Chigama atesu'faye. Ingi injama'choni se'pimbe'yi ñoa'me Jesucristo ingi'ccu can'jemba fuite qqen in'jamba Chigama ti'tsse atesu'faya'cho. Nane Jesucristoja tise anjampa tssansi ingi injama'choma giya'tsse tson. Tsa'caen giya'ensi gi ingi egae tsincon'choma aqqe'paye osha'fa. Toya'caen tayopi'su Chigama afasundeccu chandi'tssia tsa'ccui'ccu ai'voma onjonquia'caen ingi'qqe giya'tsse dapa Chigama ti'tsse atesu'faya'cho. <sup>23</sup>Ñoa'me Chigaja inginga tansintsse condasepa tsa'caen tsu tsoña. Tsa'cansi Chiga ingima coira'je qqen in'jamba jinge ta'etssia injama'choi'ccu dyombi'tsse Cristove in'jamba tsa'caen canse'faye. <sup>24</sup>Jinge ttatta'faye ma'caen tisupapora fae'ngae in'jaeccoya'chove. Tsa'caen tsu in'jaeccoya'cho tisupapora ti'tsse in'jancopa ñotsse tsoncco'faye. <sup>25</sup>Toya'caen majan a'ija Cristove in'jan qqen supa cca'i Cristove in'jan'chondeccui'ccu fae'ngae bo'fambi Chigama iñajañe. Tsa'ma que'i'qqe tsa'caen tson'fajama. Nane Na'su jiya'cho a'ta tayo napijisi atesupa gi ti'tsse fae'ngae bopa fuitecco'faya'cho.

<sup>26</sup>Toya'caen Chiga tansintsse condase'choma pañamba Jesucristoja ingima ccusha'ne pa qqen atesu'a'qqe toyayi in'jangae tsincon'ninda ¿ma'caen tsu Cristoja ingima ccusha'ña? Ñoa'me ccushaen'suma catisi faesu ccushaen'suve me'i'on tsu. <sup>27</sup>Tsa'caen tise ma cati'ta gi ñoa'me dyo'tssia've ronda'je'faya. Nane Chiga ingi injama'choma somboemba fi'ttiya'chove gi ronda'je'faya. Chigaja si'nge anchanda'je'chonga tsu poiyl'cco Tise ma chi'ga'chondeccuma ju'rian vana'ña. <sup>28</sup>Tayoe Moisés Chiga manda'choma a'inga condasesi a'ija manda'choma paña'ma chi'gapa in'jangae tsinconsi tsa egae tsinco'suma fi'tti'fa. Ai tsa'caen egae tsinconsi dos cambia afasundeccu, tsambi'ta tres, atesupa condasesi tsu nasundeccuja mende'yembe'yi tsa egae tsincon'suma fi'tti'fa. <sup>29</sup>Moisés su'choma chi'gasi mende'yembe'yi fi'tti'ninda ñoa'me tsu Chiga Dutssi'yema chiga'suja ti'tsse dyo'tsse vana'ña'cho. Jesúsja tise anjampa tssansi cuname Chiga ai'ccu in'jancco'faya'chove ashaemba a'ima ttu'sesi tsu Chiga in'jan'cho aindeccone da'fa. Tsa'ma tsendeccu'suja “Jesúsja aqqua a'ipa in'janga pa” qqen in'jamba tise'pama ccushaen'suma chi'ga'fa. Nane Chiga Qquendya'pa tise'pama ñotsse tsoña'chove'qqe se'pipa chi'ga'fa. Ñoa'me tsu

tsendeccuja ti'tsse dyo'tsse vana'faya'cho. <sup>30</sup>Ñoa'me gi atesu'fa Na'su Chiga qqen su'choma: “Ña gi injama'choma somboemba vanaen'su.” Toya'caen tsu Chiga Tevaen'jen su: “Na'su Chiga tsu tise a'i'su majan Tisema pañambian'da tsambe injama'choma'qqe somboeña.” <sup>31</sup>¡Injama'tse! Cansia Chiga ingima iyicca'yepa indi'nijan ñoa'me dyo'tssi tsu.

<sup>32</sup>Tsa'ma ñotsse injan'jen'faja. Tseyi me'ttia'ye Jesucristone pañamba qui Tise've in'jan'fa. Tsa'caen in'jamba vana'je'an'qqe qui Cristoma cati'fambi. <sup>33</sup>Poiyi'cco a'i caña'jen'ni Cristove in'jambindequijaja majan que'i'suma afasepa egae tson'fa. Tsa'caen tsincon'fasi tsendeccu vana'jensi majan que'i'suja tise'pama fuitepa fae'ngae vana'jen'fa. <sup>34</sup>Nane indiyepa piccoye'chondeccuma mende'yepa qui fuite'fa. Chigave in'jambindequija que'i an'bian'choma itsa'ni'qqe qui toya injama'choni avujatssi'fa. Nane Cristo a'ive dapa osha'cho ti'tsse ñotssiamasangae an'bian'faya qqen in'jamba qui avujatssi'fa.

<sup>35</sup>Tsa'caen Cristove in'jamba tisema injanga cati'fajama. Ñoa'me tisei'ccu qui bove ñotssiamas an'bian'faya. <sup>36</sup>Chiga ma'caen canseya'chove que'inga condase'nijan tsa'caen canse'faja. Vana'je'an'qqe antembe'yi Chiga in'janquia'caen canse'faja Chiga suquia'caen ñotssiamas isupa tsangae avujatssiye. <sup>37</sup>Nane Chiga Tevaen'jen tsu su:

Toya tsu re'ricco shaca.

Ti'tssecan tsu Na'su Cristoja  
tise suquia'caen jiya.

Junde tsu jiya.

<sup>38</sup>Tsa'cansi tsu Chigave in'jamba ño'ame da'chondeccuja  
Cristove in'jamba ro'ndá canse'faya'cho.

Tsa'ma majan injama'choni Cristoma catipa  
in'jambian'da Chigaja tisema iyicca'yepa.

<sup>39</sup>Ya'caen tsu Chiga Aya'faja su. Tsa'ma ingija tsa'caen Cristoma cati'fambi ni si'ngae anchanda'je'chonga tsangae qqe'faya'bi. Ingija Cristove ta'etsse in'jamba ccushapa tsangae canse'faya.

### Chigave in'jan'cho

**11** <sup>1</sup>Chiga ingima ñotsse tsoña'chove toya tsombisi gi tso'fei'ccu ñotssiamas atte'fambi. Tsa'ma Chigaja ño'amba tsa'caen tsoña qqen in'jamba gi tso'fei'ccu toya attembi'ma injama'choi'ccu in'jan'fa. Tsa'caen in'jamba gi avujatssse ronda'je'fa. <sup>2</sup>Nane ingi tayopi'su coenzandeccu'qqe tsa'caen Chigama paña'fasi Chigaja tise'pai'ccu avujatssi.

<sup>3</sup>Chiga Aya'fama pañamba gi in'jan'fa Chiga tsu pa'cco andema, o'fema'qqe agattoen. Tise in'jamba aya'fai'ccu afapa tsu tsa'caen tson. Nane Chigaja attembi'choamas osha'cho atteqqe'suve agattoen.

<sup>4</sup>Tayopi'su Adán dutssi'ye Abel, tise quindya Caín'qqe tise'pa afe'choma Chiganga afe'fa. Caínjan Chigave ñotsse in'jambi'ma aquia afe. Tsa'ma Abelja Chigave in'jamba ñotsse afesi Chigaja tise afe'choma

in'jamba “Abelja ño'a” qquen tsu su. Can'jemba Caínjan Abelma fi'tti. Tsa'ma Abel pa'ni'qqe toya tise canseite Chigave in'jamba canse'choma pañamba gi Chigave in'jan'chone ti'tsse atesu'fa.

<sup>5</sup>Tayopi'su Enoc'qqe Chigave in'jamba pambe'yi Chiganga ansunde. Chiga tisema ansundiansi a'ija ccase tisema atte'fambi. Nane Chiga Tevaen'jen tsu conda ma'caen Chigaja toya Enocma ansundiambi'te tsu su: “Enocja ño'asi gi avujatssi.” <sup>6</sup>Nane Chigave in'jambian'da zma'caen tsu Chigaja tisei'ccu avujatssiya? Chigama ñajaña in'jan'da o'tie tsu Tise jincho've in'jamba atesu'faya'cho. A'i Chigave ttatta'je'ninda Chigaja tsendecuma ñotsse tsoña. Tsama'qqe tsu atesuya'cho Chigama ñajaña in'jan'da.

<sup>7</sup>Tayopi'su Noé pañasi Chigaja, na'en jipa andema picco catiya'chone, tisenga condase. Noéjan Chigave in'jamba “Chiga su'choja ñoa'me su'cho” qquen atesupa Chiga mandaquia'caen rande tsa'o shavove shavoña. Tsanga otsepa tise, toya'caen tise antiandeccu'qqe pambe'yi ccusha'fa. Cca'indeccuja in'jambipa pa'fa. Tsa'caen tsu Noéjan Chigave in'jamba ccushapa cca'indeccu in'jambipa pa'fa'chone ti'tsse canjaen. Chigave in'jansi tisene tsu Chigaja su: “Noéjan Ñame in'jamba tsu ño'a.”

<sup>8</sup>Tsa'caeni Abraham'qqe Chigave in'jamba ñotsse pañasi Chigaja tisema ttu'sepa biani faesu andenga mandamaña. Tseni tisu andeve isupa an'biaña'chone conda. Mandamañasi Abrahamjan tise aindecuma catipa ja. Tsa'ma tisu mani japa andeve isuya'choma atesumbe'yi ja. <sup>9</sup>Japa Chiga tisenga afeye qquen su'cho andeni can'jemba cca'indeccuni pasia'su jiquia'caen can'jen. Carpa tsa'oi'ccu tsu cca'tti cca'tti jacan. Tise dutssi'ye Isaac'qqe tsa'caen can'jensi tsambe dutssi'ye Jacob'qqe tsa'caeni omboen can'jen. Tsendeccu'qqe “Chigaja va andema inginga afeya” qquen in'jamba tsa'caen avujatse can'jen'fa. <sup>10</sup>Nane Abraham carpai'ccu cca'tti cca'tti can'jemba ñoa'me faesu joquitssian'masia can'jeña'chove in'jamba ronda'je. Chiga tsangae can'jeña'chonga tsu Chigai'ccu can'jeña. Nane Chiga tsu Tisu in'janquia'caen Tisu can'jeña'chove ñoña.

<sup>11</sup>Abraham pushe Sara'qqe dusungambipa ñoa'me coenza ccashe. Tsa'ma Chiga “Du'shuma qui isuya” qquen Saranga susi Saraja Chigave in'jan cuintsu tsa'caen tsoñe. Nane Chigave in'jamba ccase dusungae daquia'caen dapa du'shuvu isu. <sup>12</sup>Tsa'cansi fae a'i'ye tsu injantssia a'i atapa'fa. Abraham'qqe tayo coenza ccasheyepa dusungambi. Tsa'ma sefacconi'su o'fema agattoye oshambiquia'caen ja'ño Abraham omba'su dutssiyendecuma'qqe agattoye oshambi. Nane marni'su sisipa jinchoma agattoye oshambiquia'caen tsu tise omba'su dutssiyendecuma'qqe agattoye oshambi.

<sup>13</sup>Poiyi'cco vandeccuja –Abraham, Isaac, Jacob'qqe– Chigave in'jan'fa. Tsa'ma pa'cco Chiga tise'panga afeya'choma toya isumbe'yi pa'fa. Tso'fei'ccu attembi'ma injama'choi'ccu in'jan'fa Chigaja jai'ngae tise'pa a'ima tsain'bitsse atapoña. Qquen in'jamba asi'ttaemba avujatssi'fa. Tise'paja ñoa'me va ande'su a'imbi qquen atesupa aquia re'riccoe vani

can'jenccaye qqen in'jan'fa. <sup>14</sup>Nane a'ija tsa'caen in'jamba tsu ñoa'me tise'pa tsangae can'jeña'chove ronda'je'fa. <sup>15</sup>Tisuma isu'cho andeni toequi jaye in'jan'fambi. Nane ñoa'me toequi jaye in'jan'choecan'da tsu jaye osha'faye'can. <sup>16</sup>Tsa'ma tseni jaye in'jambipa ñoa'me bove ñotsse can'jeña'chonga jaye in'jan'fa. Nane Chigave in'jamba tisu Chiga qqen supa sefacconi japa tsangae Tisei'ccu can'jeña'chonga jaye in'jan'fa. Tsa'caen in'jansi Chigaja tise'pai'ccu avujatssi. Tisu a'l'fa qqen supa tsu ñotssia canqqeve tise'pane ñoña tseni tise'pai'ccu tsangae canseye.

<sup>17-18</sup>Chigaja Abraham Tisema ñoa'me paña qqen atesuye in'jamba Abrahamma manda cuintsu tise dutssi'ye Isaacma fi'ttipa Tisenga afeye. Mingae tson'me'se qqen in'jamba aquia mandasi Abrahamjan Chigave in'jamba paña. Tsa'caen pañamba Chiganga afeya'chove Isaacma fi'ttiye anga. Nane Chigaja tayoe Isaacne Abrahamnga su: “Isaacyi tsu que dutssi'ye. Tisei'ccu gi que omba'su dutssiyendecuve atapoeña.” Qquen su'a'qqe Chiga ccase afapa Isaacma fi'ttipa Tisenga afeye mandasi Abrahamjan se'pimbe'yi afepa fi'ttiye anga. <sup>19</sup>Nane Abrahamjan Chigave in'jamba qqen asi'ttaen: “Chiga mandasi fi'tti'ninda Chigaja ña du'shuma ccase qqendyaeña.” Nane ti'tssecan'da tsu tsa'caen tsoñe'can. Canjaen'chove Abraham Isaacma afepa pan fi'ttiye tson'jensi Chigaja tisema se'pisi Isaac ccase qqendyaquua'caen canse.

<sup>20</sup>Toya'caen Isaac Chigave in'jamba tise dutssiyendeccu, Jacob, Esaúnga'qqe conda Chiga tise'panga jai'ngae ñotsse tsoña'choma.

<sup>21</sup>Toya'caen Jacobja, Egipto andeni japa can'jemba coenza ccashe'yeve da. Tise'qqe Chigave in'jamba paye tson'jemba Chiga ñotsse tsoña'choma José dos dutssiyendecunga conda. Condapa tise accuicco'chonga puntssamba Chigama ññajan cuintsu tise'pama ñotsse fuiteye.

<sup>22</sup>José'qqe can'jemba coenza ccashe'yeve dapa israendeccu jai'ngae Egipto ande'ye sombo'faya'chone condase. Chigave in'jamba manda cuintsu jai'ngae a'i jayi'ta tise tsu'ttama'qqe angapa Canaán andeni a'tu'faye.

<sup>23</sup>Israendeccuja bo'tsse Egiptoni can'jemba semamba vana'jen'fa. Moisésve isupa tise yaya tise mama Chigave in'jamba Egipto ande'su na'suma dyo'fambi. Nane na'suja tayo tsu israendecuma manda cuintsu tsandie du'shuve isu'ta fi'tti'faye, israendeccu panshaen tsain'bitsse atapasa'ne. Tsa'ma Moisésja me'deccoa du'shusi tres ccovuve tisema fi'ttimbe'yi tsaoni a'tutsse an'bian'fa.

<sup>24</sup>Egipto na'su onque'nge Moisésma attepa ccushaen. Tise tsaoni Moisésma angapa tise dutssi'yeve tsomba tisema coeña. Tsa'ma Moisésja coemba Chigave in'jamba ñotsse paña. Pañamba Egipto na'su onque'nge dutssi'yeve can'jeñe chi'ga. <sup>25-26</sup>Nane can'jen'choecan'da tsu na'suve dapa osha'cho Egipto'su ñotssia jincho'choma an'biañe'can. Tsa'ma Moisésja asi'ttaen: “Na aindecuma catipa re'riccoe tsa'caen can'jen'da egae gi tsincon. Bove ñotssi tsu ññajan Chiga in'jan'cho israendeccu'ccu fae'ngae vanañe.” Nane omboe Cristo'qqe a'ima fuiteye a'ive dapa vana. Toya Cristo

jimbi'te tsu Moisésja tsa'caen asi'ttaemba qquen in'jan: “Chigaja ñoa'me na'supa inginga ti'tsse ñotsse afeya. Tsa'caen in'jamba gi avujatsse vanaña.”

<sup>27</sup>Nane ombœ Moisésja Chigave in'jamba israe aindecuma angacamba Egipto ande'ye somboen faesu andeni jaye. Egipto'su na'su iyicca'yepa se'pi'ni'qqe Moisésja dyombe'yi a'ima somboen. Nane attembi'a'qqe Chiga tise'ccu fae'ngae jacan qquen in'jamba dyombi'tsse a'ima somboemba angacan.

<sup>28</sup>Egiptosundecuma israendecuma somboye se'pisi Chigaja iyicca'yepa tisema sefacconi'su shondo'suma manda cuintu poi'yi'cco Egipto'su aisheve isu'cho tsandideccuma fi'ttiye. Tsa'caen mandasi Moisésja pañamba israendecuma manda cuintu ovejama fi'ttipa anjampai'ccu tise'pa tsa'o sombo'ttima onjoñe sefacconi'su shondo'su tsama attepa fi'ttimbe'yi panshañe fae israe'su tsandie pa'fasa'ne.

<sup>29</sup>Tsa'caen panshansi sombopa jayipa israendecuma santsseyi Cu'amar na'ema isé panshan'fa. Nane Chiga tsa'caen na'en enttingema tise'pa jaya'quive samboensi Chigave in'jamba santsseyi panshan'fa. Tsa'ma Egipto'su sundarondecuma tsendecuma mandiamba tsa'caen iseye tson'jen'fasi marja toequi jipa tise'pama andecconi'su pa'fa.

<sup>30-31</sup>Jericó canqueni nabi'fasi Chigaja “Tsa canquema'qqe qui patsuya” qquen susi israendecuma a'ima manda'fa cuintu a'tutsse japa canquema atte'faye. Tsa'ma Jericó sundarondecuma tsendecuma indiyé in'jan'fasi tsa'oma afe'su pushesu, Rahab, tise'pama a'tupa ccushaen. Rahab injama'choni ñoa'me Chigama pañañe in'jamba tise'pama tsa'caen fuite. Tsa'caen tsonsi israendecuma Chigave in'jamba pañamba siete a'ta pa'cco tsa canquema shoquendí jacan'fa. Nane Chiga mandasi tsa'caen shoquendí'fasi canquema patui'ccu ttu'choja tisuyi osui. Tsa'caen osuisi poi'yi'cco jericosundecuma Chigama pañambipa tsangae pa'fa. Tsa'ma Rahabja Chigave in'jamba israendecuma fuitépa pambe'yi ccusha.

<sup>32</sup>¿Ja'ñonda ti qui in'jan'fa? Nane a'ta tsu shaca pa'tssima condaye ma'caen a'i Chigave in'jamba tson'fa'choma. Nane tayopi'su a'i, Gedeón, Barac, Sansón, Jefté, David, Samuel, poi'yi'cco Chiga Aya'fama afasundecuma Chigave in'jamba ñotsse tson'fa. <sup>33</sup>Nane tsendecuma Chigave in'jamba faesu andesundecuma patsufá. Na'suve dapa israendecuma ñotsse manda'fa. Chiga tise'pama ñotsse tson'fa'choma pañamba in'jan'fa. In'jansi Chigaja tsa'caen tise'pama ñotsse tson. Cca'indeccu tise'pama fi'ttiye ttesinga ttova cati'fasi Chigaja ttesi aya'fama picco tise'pama ansa'ne. <sup>34</sup>Majamajan fi'ttiye si'ngenga cati'fasi Chigaja si'ngema se'pi tise'pama oquesa'ne. Matichi'ccu majan Chigave in'jan'chondecuma fi'ttiye tson'jen'fasi Chigaja tise'pama ccushaen. Vana'jemba ñoa'me oshambisi Chigaja tise'pama quiñaen. Quinse'tsse dapa faesu ande'sui'ccu iyiccopa patsupa tteya maña'fa. <sup>35</sup>Nane majan Chigave in'jan'cho pushesundecuma, tise'pa in'jan'chondecuma pasi Chigaja pa'chondecuma ccase qquendyaen.

Tsa'ma majandecuma Chigave in'jamba indiyepa ti'tsse dyo'tsse vana'jen'fa. “Que Chigama a'tie'ninda gi quema fettaya” qquen tsu indisundecuma su'fa. Tsa'ma

Chigave in'jamba a'tiembeyi dyo'tsse pa'fa. “Papa gi Chigai'ccu ñotsse canseya” qqen in'jamba tsu pa'fa. <sup>36</sup>Toya'caen a'ija majan Chigave in'jan'chondeccuma afasepa ma'ppi'fa. Candenai'ccu tandamba picco'je'cho ettinga picco'fa. <sup>37</sup>Patui'ccu ttovaccoemba majama fi'tti'fa. Majamanda serochoi'ccu tise ai'voma doña gettipa fi'tti'fa. Majamanda dyo'tsse vanaemba “Chigave in'jan'choma cati'faja ccushaye in'jan'da” qqen tsu su'fa. Majamanda matichi'ccu fi'tti'fa. Tsa'ma cca'li Chigave in'jan'chondeccuja buttopa japa ccuya'fa. Nane sarupave me'i'onsi oveja ttono, chivo ttonoma'qqe ondiccu'fa. Noñangiañemba va'chapa añ'a'cho me'i'onsi quipoe'supa vana'jen'fa. Nane va ande'su aindeccu tise'pama chi'gapa egae tsincon'fa. <sup>38</sup>Tsa'caen tsincon'fasi a'li menia jacamba ccotta'ccongá ansundepa fattocco changonga ca'nimba canse'fa. Tsa'ma tise'paja ñoa'me ti'tsse joccapitssiasi va andeja napimbi tsu tise'pa ñotsse can'jeña'cho andeve daye.

<sup>39</sup>Poiyi'cco vandeccuja ñoa'me Chigave ñotsse in'jansi Chiga “Tise'paja ño'a'fa” qqen tsu su. Tsa'ma Chigaja Tise aindeccunga ñotsse tsoña'chove condasepa toya tsa'caen tsombisi sendeccuja isumbe'yi pa'fa. <sup>40</sup>Nane Chigaja bove ñotsse in'jamba ronda'je. Ingi can'jen'ni Cristo jipa poi'yi'cco ingima'qqe ccushaen cuintsu tayopi'su Chigave in'jan'chondeccu'qqe fae'ngae ingi'ccu ño'ame da'faye.

### Cristove in'jamba canseya'cho

**12** <sup>1</sup>Tsain'bitssi a'li tsu tsa'caen Cristove in'jamba cansepa pa'fa. Ja'ño ingi'qqe canse'fa. Tsendeccu Chigave in'jamba ñotsse cansequia'caen tsu canse'faya'cho. Tsa'caen in'jamba jinge osha'cho injanga tson'choma anttepa Cristoveyi in'jamba canse'faye. Toya'caen egae tsincon'choja ai'yembe ingima qqueñañe osha. Tsa'cansi jinge osha'cho egae tsincon'choma chi'ga'faye ingima qqueñasa'ne. Tsa'cansi jinge ánttembe'yi paya'ngae Chiga ingima in'jamba canjaenquia'caen canse'faye. <sup>2</sup>Nane Jesúsja ingima tsu canjaen ma'caen canse'faye. Tise can'jen'chove in'jamba gi ma'de'faya'cho. Nane tiseja ingima ccushaemba ingima atesian'su tsu. Tiseja in'jangae tsincon'sia'caen avuja'ccongá pa. Tsa'ma ansangembe'yi tsa'caen pa ingima ccushaene. Jai'ngae ingi'ccu avujatssiya qqen in'jamba tsu tsa'caen vana. Vanamba papa Chiga sefacconi japa na'suve dapa Chiga tansinfani dyaipa mandal'je.

<sup>3-4</sup>Jesúsma injan'jen'faja quimbipa ñoquimbisa'ne. Egae tsincon'sundeccu tsu tisema da'ñomba egae tson'fa. Tsa'caen tsomba tisema fi'tti'fa. Que'i'qqe vana'jen'fa. Tsa'ma vana'je'an'qqe toya qui tisia'caen pa'fambi. Tsa'camba ñotsse in'jamba tisema injan'jen'faja. <sup>5</sup>¿Aque'pa'fa ti qui Na'su Chiga que'inga qqen su'chomajan? Que'ija Tise dushundeccusi tsu qqen su:

Na dutssi'ye, quema Na'su nafattiansi Tise su'choma chi'gajama.  
Que'ima iyu'u'ni'qqe ñoquimbi'fajama.

<sup>6</sup>Nane Na'su tsu tise in'jan'choma nafattian.

Majama tise du'shube ñotsse in'jamba tsama tsu vanaeña cuintsu ti'tsse atesuye.

7Nafattiansi vana'jen'da qui quimbimbe'yi paña'faya'cho. Nane Chiga Quitsa tsu Tise dushundeccuve que'ima in'jamba tsa'caen nafattian. Nane poi du'shu tsu tise yaya nafattiansi coen'fa. 8Chigaja poi'cco Tise du'shuma nafattian. Tsa'ma Tise que'ima nafattiambi'ninda ñoa'me'qqe Tise dushundecumbi qui. Nane yaya mechoa du'shua'caen injanga coen'fa'cho qui. 9Toya'caen va andeni cansepa gi ingi yayandecuma ñotsse in'jamba paña'fa. Ingima nafattaiamba iyu'upa vanaensi gi pañamba tise'pama ti'tsse ñotsse in'jan'fa. Tsa'caen tise'pama pañasi ingi sefacconi'su Yaya ingima nafattia'ninda gi ti'tsse Tisema pañamba ñotsse in'jan'faya'cho. Tsayita gi ñoa'me canseye ashaen'faya. 10Nane ingi va andeni cansesi ingi yayandecuja re'riccone ingima atesian'fa. Ma'caen ñotsse canseya'chove asi'ttaemba tsu tsa'caen ingima nafattian. Tsa'ma Chiga inginga nafattian'choja ñoa'me fuiteye nafattian'cho tsu. Nane Tiseja tsangae ño'amba ingima tsu nafattian Tisia'caen ño'ame da'faye. 11Cca'i ingima iyu'upa nafattiañe'da gi in'jambi. Nane tsa'caen vana'jen'choja “Ega tsu” qqen gi in'jan'fa. Tsa'ma tsa'caen vana'jemba omboe injama'choni ñotsse atesupa gi tansintsse opatsse canse'fa.

### Chigama pañambipa tsu catiyeya'cho

12Poe'su'fajama. Tsa'ma quin'sui'ccu Jesúsve in'jamba sema'faja. Dyopa ttun'dundule'fajama. Jesúsve in'jamba dyombi'tsse canse'faja. 13Tansintssia tsaiquima omboemba jacanquia'caen osha'cho afopoensi paña'jen'choma catipa tansintsse atesian'jen'choma ti'tsse paña'faya'cho. Tsayita qui ccushapa ti'tsse ta'etsse in'jamba amppimbe'yi canse'faya. 14Que'lja ma'caen osha'ta cca'indeccui'ccu iyiccombe'yi opatsse canse'faja. Toya'caen Chiga in'janquia'caen ño'ame daye in'jamba canse'faja. Nane tsa'caen cansembi'ta qui Na'su Cristo Jesúsma atteye osha'faya'bi. 15Tisupapora ñotsse coiracco'faya'cho cuintsu poi'cco Chiga que'ima fuitel'je'choma ñotsse atesul'faye. Toya'caen injama'tse injama'choi'ccu faesuma se'pipa fae'ngae in'jambipa iyiccosa'ne. Tsa'caen ashaen'da tsain'bitssia a'ima qui dañofaya. 16Toya'caen majañi'qqe pushembe'yi pushesui'ccu can'jenjama. Ni Esaú'caen tsincon'fajama. Tise'qqe Chiga in'jan'choma chi'gapa va ande'su jincho'choma junde tsu in'jan. Nane yaya dutssi'ye coenzanga afeye su'choma rondal'jeye in'jambipa qquipoe'supa tisenga afeye su'choi'ccu añal'chove tise quishima cambian junde an ttepuye. 17Tsa'caen tsomba omboe tisenga afeye su'choma isuye in'jansi tise yayaja tisenga afeye se'pi. Se'pisi ñoa'me injama'choi'ccu in'jamba i'na. Tsa'ma i'na'a'qqe isuye oshambi. Tsa'caen injanga catipa tsangae tsu pasa. 18Tayopi Chigaja aindecunga condasesi dyo'fa. Que'lja tsendequua'caen Chigama paña'fambi. Nane pañasundecuja Sinaí ccotta'ccongca ca'tsa napijipa bo'fa. Tsa ccotta'cconi sintssi dyo'tssi ccutsusi tsu attepa in'jan'fa Chigaja pporotsse can'jen. Si'nge anchanda'je'choma'qqe atte'fa.

Toya'caen quia'me fingiansi tsanda tsu afa. <sup>19</sup>Jen'cho jensi a'ija paña'fa. Tsomba aya'fama pañamba dyopa Chigama ñajan'fa cuintsu ti'tsse afambe'yi ziyaye. <sup>20</sup>Nane Chiga Aya'fa qquen manda'choma pañamba tsu dyo'fa: “Ña vani can'jensi majan va ccotta'cconga catsepa jaca'ninda tsu tsama patui'ccu ttovaccoemba fi'ttiya'cho. Nane oveja'qqe jaca'ninda tsu tsama'qqe fi'ttiya'cho.” Aya'fa qquen susi a'ija ñoa'me osha'fambi. <sup>21</sup>Nane Moisés'qqe tsama pañamba atepa su: “Ttun'dunduje gi dyo.”

<sup>22</sup>Tsa'ma que'lja tsa'caen dyo'tssia'ma paña'fambi. Nane ñotsia Zión ccotta'cconga ansundequua'caen qui cuname Chigama atesu'fa. Tise aindecuve dapa qui Chiga can'jeni catse'fa Tisei'ccu tsangae canseye. Jerusaléni Chigama ñajañe boquua'caen qui ja'ño sefaconi'su Jerusalén canquenga catse'fa tseni Chigama pañañe. Tseni tsu tsain'bitssi Chiga sefaconi'su shondosundeccuja Tisei'ccu avujatsse canse'fa. <sup>23</sup>Nane poiyyi'cco Chigave in'jamba ttuseye'chondeccu tsu Tise a'ive dapa tseni can'jen'fa. Injama'choma somboen'su Chiga Quitsanga qui catse'fa. Poiyyi'cco majan ñotssisi Chigaja tise'pama nanitsse ñotsse tsomba ccase qquendyaen. Que'i'qqe qui tsendeccunga catse'fa tise'pai'ccu ca'niñe. <sup>24</sup>Ñoa'me qui Jesúsnga catse'fa. Tiseja Chiga cuname a'i'ccu fae'ngae injancco'fa'choma a'inga condapa ingine afa'su tsu. Tise anjampa tssansi a'ima tsangae nanitsse ccushaen. Nane Cañjan tayopi Abelma fi'ttisi Abel anjampaja tssan. Tise anjampa tssan'cho afaye osha'choecan'da tsu: “Ccane'qqe Cañma fi'ttija” qquen suye'can. Tsa'ma Jesús anjampa tssan'cho afaye osha'choecan'da tsu: “Poiyyi'ccoma ccushaenjan” qquen afaye'can.

<sup>25</sup>Chiga Jesucristoi'ccu que'inga afa'choma ñotsse paña'faja. Chigaja tayopi'su a'inga Moisési'ccu condasesi paña'ma chi'ga'fa. Tise'pa tsa'caen aquia a'i'ccu su'choma chi'gapa catiye'nijan ¿ma'caen qui que'lja Jesucristo su'choma chi'ga'ta ccusha'faya? <sup>26</sup>Tsaite Chiga Moisési'ccu condasesi andeja oya. Tsa'ma ja'ño Tiseja ñoa'me tsoña'chone qquen tansintsse conda: “Toya'caen fae seyi gi ccase andema oyaña. Nane ande, sefaccoma'qqe gi oyaña.” <sup>27</sup>Chigaja “Toya'caen fae seyi...” qquen supa tsu pa'tssi Tise agattoen'choma oyaen catiya'chone condaye in'jan. Nane osha'cho oyaqqe'suve Chiga agattoen'chota tsu joqqitssi catiye'cho. Tsa'ma oya'masia tsu tsangae jinchoya.

<sup>28</sup>Tsa'cansi ingija Chiga aindecuve da'ta gi tsangae jincho'faya. Tsa'caen atesupa gi avujatsse Chigama afa'je'fa. Nane Tisema ñotsse in'jamba jinge Tise in'janquia'caen can'jemba dyoe'sui'ccu Tisema ñajan'faye. <sup>29</sup>Ñoa'me ingi Chigaja si'ngia'caen tsu Tise've in'jambindequuiama tsangae oque catiya.

### Chiga a'ive dapa cansey'a'cho

**13** <sup>1</sup>Antte'fajama que'i faenga'su Cristove in'jan'chondeccuma ñotsse injancco'fa'choma. <sup>2</sup>Que'ima toya atesumbi'choa Jesucristove in'jan'chondeccu ji'nijan tise'pama ansundiamba fuite'faja. Majan

tayopi'su a'ija tsa'caen tsomba tsu atesumbe'yi Chigama sefacconi'su shondosundecuma fuite'fa.

<sup>3</sup>Majan Cristove in'jan'chondecuja tsa'caen in'jamba picco'je'cho ettinga piccoyepa vana'jen'fa. Piccoyepa vana'jen'chondecuma aqqe'pambe'yi tise'pai'ccu fae'ngae piccoyequia'caen tise'pama mende'ye'faja. Faesundecuja Cristove in'jansi nasundeccu ma'ppisi tsu vana'jen'fa. Que'i'qqe vanaqqe'supa tise'pama mende'yepa injama'choni fae'ngae vana'jen'faja.

<sup>4</sup>Tsandieja pusheye tsu ñotssi. Pushesu'qqe tsa'nduye tsu ñotssi. Tsa'caen antte'fasi egave in'jan'fajama. Tsa'ma majan pushe'ta, majan tsa'ndu'ta ñotsse in'jamba tisenga antte'choi'ccuyi tsu can'jeña'cho. Faesui'ccu can'jen'fajama. Majan tise pushe, tise tsa'nduma catipa faesui'ccu in'jangae can'jen'nijan Chiga Quitsa tsu tsambe injama'choma somboëña.

<sup>5</sup>Panshaen corifin'dive in'jambe'yi canse'faja. Chiga Quitsaja su: "Ñajan que'ima catiya'bi gi. Tsangae gi que'ima an'biaña." Tsa'caen Chiga su'choma in'jamba que'i tayo an'bian'choi'ccuyi ñotsse avujatsse canse'faja. <sup>6</sup>Chiga tsa'caen susi gi ñoa'me avujatsse in'jamba su'fa:

Na'su Chigaja ñama fuite'su tsu.

Dyombe gi can'jeña. ¿Ma'caen tsu a'ija ñama dañña?

<sup>7</sup>Chiga Aya'fama que'inga me'ttia'ye atesiansundecuma aqqe'pa'fajama. Tise'pa ma'caen cansepa ñotsse tson'choma injan'jen'faja. Tise'panga ma'depa Jesucristove in'jamba canse'faja.

<sup>8</sup>Nane Jesucristoja ccaningaambi. Tayópi, ja'ño, tsangae tsu ccaningaambi. <sup>9</sup>Tsa'cansi ccaningae atesian'jen'choma paña'da tsama in'jan'fajama. Majan atesiansundecuja aña'choma aña se'pi'fa tsa'caen tsomba injama'choma quiñaëñe qquen supa. Nane tsendeccu tsa'caen se'pipa canse'fasi tise'pa injama'choja toeninga ega tsu. Ñoa'me Chiga ingima in'jamba afe'cho tsu ingi injama'choma quiñaenqqe'su.

<sup>10</sup>Chigama afasundeccu, majan Chigai'ccu cachuicco'je'chonga semamba, Chiganga afe'cho'suma an'fa. Tsa'ma ingija faesu Chiganga afe'choma an'bian'fa. Toya tayopi'su manda'choma in'jan'ninda Cristoja tsendecuma fuitepa ccushaëñe oshambi. <sup>11</sup>Toya'caen manda'cho mandaquua'caen egae tsincon'choma joquitssiañe vaura, chivoma fi'ttipa tsambe anjampa tssan'choi'ccu Chigama iñajan'fa. Chigama afa'su na'suja tsa anjampama Chigai'ccu cachuicco'je'tti'su quartonga anga Chigama iñajañe. Tsa'ma vaura, chivo ai'vomajan canqqe joccani angapa tsu oque'fa. <sup>12</sup>Tsa'caëñi Jesucristo'qqe canqqe joccani avuja'cconga vanamba pa, tise anjampai'ccu aindecu egae tsincon'choma joquitssiamba tise'pama ño'ame tsoñe. <sup>13</sup>Tsa'cansi jinge ingi'qqe canqqe joccani jaquua'caen va ande'su in'jan'choma catipa Jesúsve in'jamba tisia'caen dyombi'tsse vana'faye. <sup>14</sup>Nane va andeni gi tsangae can'jen'faya'bi. Tsa'ma jai'ngae Chigai'ccu tsangae canse'faya qquen in'jamba gi avujatsse ronda'je'fa.

<sup>15</sup>Tsa'caen ronda'je'ta tayopi'su a'i poi a'ta Chiganga afe'choma afeqquia'caen jinge poi a'ta Cristove in'jamba Chigane ñotsse afapa iñaján canse'faye. Ingi aya'fai'ccu tsu cca'indeccunga Cristoja ño'a qqen ñotsse condase'faya'cho. <sup>16</sup>Aqqe'pa'fajama ñotsse tsoñe. Que'i an'bian'choma'qqe Chiganga afeqquia'caen mendeqquianga attufaeña'cho. Tsa'caen attufaensi tsu Chigaja que'i'ccu avujatssiya.

<sup>17</sup>Que'ima Jesucristone atesiansundecuma ñotsse pañamba tise'pa candusianquia'caen tson'faja. Nane Chiga mandasi tsu tsendecuja que'ima coira'je'fae fae'cco qqe'fasa'ne. Que'i ñotsse pañambi'ninda tsu tsendecuja ñombi'ye'faya. Tsa'cansi ñotsse canse'faja cuintsu tise'pa avujatse que'ima coira'faye. Nane que'i egae tsincon'ninda tise'paja ñombi'ye'faya. Toya'caen Chiga tsu que'ima iyu'uya.

<sup>18</sup>Inginge Chigama iñajan'faja. Injama'choni Chiga in'janquia'caen in'jamba gi osha'chone ñotsse tson'fa qqen gi in'jan'fa. Toya'caen ti'tsse tsa'caen tsoña'chove gi in'jan'fa. <sup>19</sup>Nane chigáne Chigama ñoa'me iñajan'faja cuintsu Tise ñama oshaensi junde que'ini jiyi.

#### Anttepa chigambian'cho

<sup>20</sup>Ingija oveja'can'fa gi. Na'su Jesúsja ti'tsse'tssia ingima coira'su tsu. Tise anjampa tssansi tsangae tsu ñoña cuintsu Chiga a'i'ccu cuname fae'ngae injancco'faye. Pasi Chiga Quitsa, opatsse tson'su, tisema ccase qqendyaen. In'jan'fa gi cuintsu Chiga Quitsa <sup>21</sup>osha'cho ñotssiamia que'inga afesi que'ija ño'ame dapa Tise in'janquia'caen ñotsse canse'faye. Toya'caen gi in'jan'fa cuintsu Jesucristo poi'cco ingima in'jaemba fuitesi Chiga in'jan'chove tson'faye. Tsangae tsu Jesucristoja ti'tsse'tssia.

Tsangaeyi.

<sup>22</sup>Re'riccoe tevaemba gi que'ima candusian. Chigáne, faengasundeccu, ña candusian'choma ñotsse paña'faja. <sup>23</sup>Nane ñotsse in'jan'faja: Faenga'su Timoteomanda tsu piccoje'cho etti'ye tayo somboen'fa. Tise junde ñani ji'ninda gi fae'ngae que'ini jipa atte'faya.

<sup>24</sup>Poiyi'cco que'ima Jesucristone atesiansundecuma chigambian'faja. Nane poiyi'cco Chiga aindecuma'qqe chigambian'faja. Italia ande'su Cristove in'jan'chondeccu'qqe ñai'ccu can'jemba que'ima chigambian'fa.

<sup>25</sup>In'jan'fa gi pa'cco Chiga ñotssiamia qui isu'faya.

Tsangaeyi.